

# სავედრებელი პარაკლისი

## წმიდისა მოციქულისა თომას მარჩბივისა

მღდელი: კურთხეულ არს-ი.

და უკეთუ ერისკაცია, იტყვს: უფალო იესუ ქრისტე, ძეო ღმრთისაო, ლოცვითა ყოვლადწმიდისა დედისა შენისაჲთა და ყოველთა წმიდათაჲთა, შეგვწყალებ ჩუენ, ამინ.

დიდებაჲ შენდა, ღმერთო ჩუენო, დიდებაჲ შენდა.

მეუფეო ზეცათაო, ნუგეშინისმცემელო, სულო ჭეშმარიტებისაო, რომელი ყოველგან ხარ და ყოველსავე ადავსებ მაღლითა შენითა, საუნჯეო კეთილთაო, მომნიჭებელო ცხოვრებისაო, მოვედ და დაემკვდრე ჩუენ შორის და წმიდა-მყვენ ჩუენ ყოვლისაგან ბიწისა და აცხოვნენ, სახიერო, სულნი ჩუენნი.

წმიდაო ღმერთო, წმიდაო ძლიერო, წმიდაო უკუდაო, შეგვწყალებ ჩუენ (3-გზის).

დიდებაჲ მამასა და ძესა და წმიდასა სულსა, აწ და მარადის და უკუნითი უკუნისამდე, ამინ.

ყოვლადწმიდაო სამებაო, შეგვწყალებ ჩუენ; უფალო, გვკესენ და გვლხინე ცოდვათა ჩუენთაგან; მეუფეო, შეგვრდვენ უსჯულოებანი ჩუენნი; წმიდაო მოიხილე და განჰკურნენ უძლურებანი ჩუენნი სახელისა შენისათჳს.

უფალო, შეგვწყალებ (3-გზის).

დიდებაჲ მამასა და ძესა და წმიდასა სულსა, აწ და მარადის და უკუნითი უკუნისამდე, ამინ.

მამაო ჩუენო, რომელი ხარ ცათა შინა, წმიდა იყავნ სახელი შენი, მოვედინ სუფევაჲ შენი, იყავნ ნებაჲ შენი, ვითარცა ცათა შინა, ეგრეცა ქუეყანასა ზედა, პური ჩუენი არსობისაჲ მომეც ჩუენ დღეს, და მომიტევენ ჩუენ თანანადებნი ჩუენნი, ვითარცა ჩუენ მიუტევენ თანამდებთა მათ ჩუენთა და ნუ შემიყუანებ ჩუენ განსაცდელსა, არამედ მიკსნენ ჩუენ ბოროტისაგან.

მღდელი: რამეთუ შენი არს სუფევაჲ...

უფალო, შეგვწყალებ (12-გზის).

დიდებაჲ მამასა და ძესა და წმიდასა სულსა, აწ და მარადის და უკუნითი უკუნისამდე, ამინ.

მოვედით, თაყუანის-ვსცეთ მეუფესა ჩუენსა ღმერთსა.

მოვედით, თაყუანის-ვსცეთ და შეუვრდეთ ქრისტესა მეუფესა ჩუენსა ღმერთსა.

მოვედით, თაყუანის-ვსცეთ და შეუვრდეთ თვით ქრისტესა მეუფესა და ღმერთსა ჩუენსა.

უფალო, შეისმინე ლოცვისა ჩემისაჲ, ყურად-ილე ვედრებაჲ ჩემი ჭეშმარიტებითა შენითა, შეისმინე ჩემი სიმართლითა შენითა; და ნუ შეხუალ საშჯელსა მონისა შენისა თანა, რამეთუ არა განმართლდეს შენ წინაშე ყოველი ცხოველი, რამეთუ დევნა მტერმან სული ჩემი და დაამდაბლა ქუეყანად ცხორებაჲ ჩემი, დამსუა მე ბნელსა შინა, ვითარცა მკუდარი საუკუნოჲ. და მოეწყინა ჩემთანა სულსა ჩემსა, და ჩემ შორის შემიდრწუნდა გული ჩემი. მოვიკსენე დღეთა პირველთაჲ, და ვიწურთიდ ყოველთა მიმართ საქმეთა შენთა და ქმნულსა კელთა შენთასა ვზრახვედ. განვიპყრენ შენდამი კელნი ჩემნი, და სული ჩემი, ვითარცა ქუეყანაჲ ურწყული შენდამი. მსთუად შეისმინე ჩემი, უფალო, რამეთუ მოაკლდა სულსა ჩემსა; ნუ გარე-მიიქცევ პირსა შენსა ჩემგან, და ვემსგავსო მათ, რომელნი შთავლენან მღჳმესა. მასმინე მე განთიად წყალობაჲ შენი, რამეთუ მე შენ გესავ; მაუწყე მე, უფალო, გზაჲ, რომელსაჲცა ვიდოდი, რამეთუ შენდამი აღვიდე სული ჩემი. მიკსენ მე მტერთა ჩემთაგან, უფალო, რამეთუ შენ შეგვეკვდრე-მასწავე მე, რამათა ვყო ნებაჲ შენი, რამეთუ შენ ხარ ღმერთი ჩემი; სული შენი სახიერი მიძლოდეს მე ქუეყანასა წრფელსა. სახელისა შენისათჳს, უფალო, მაცხოვნო მე და სიმართლითა შენითა

გამოიყვანო ჭირისაგან სული ჩემი. და წყალობითა შენითა მოსრნე მტერნი ჩემნი და წარსწყმიდნე ყოველნი მაჭირებელნი სულისა ჩემისანი, რამეთუ მე მონაა შენი ვარ.

დიდებაა მამასა და ძესა და წმიდასა სულსა, აწ და მარადის და უკუნითი უკუნისამდე ამინ.

ალილუია, ალილუია, ალილუია, დიდებაა შენდა ღმერთო.

ალილუია, ალილუია, ალილუია, დიდებაა შენდა ღმერთო.

ალილუია, ალილუია, ალილუია, დიდებაა შენდა, ღმერთო ჩუენო, დიდებაა შენდა.

ღმერთი უფალი და გამოგზნდა ჩუენ, კურთხეულ არს მომავალი სახელითა უფლისაათა.

მუკლი 1. აუვარებდით უფალსა, რამეთუ კეთილ, რამეთუ უკუნისამდე არს წყალობაა მისი.

მუკლი 2. ყოველი თესლები გარე მომადგა მე, და სახელითა უფლისაათა ვერეოდე მათ.

მუკლი 3. არა მოგკუდე, არამედ ვცხოვნდე, და განვსთქუნე მე საქმენი უფლისანი.

მუკლი 4. ლოდი, რომელი შეურაცხყვეს მაშენებელთა, ესე იქმნა თავ კიდეთა, უფლისა მიერ იყო ესე, და არს საკურველ წინაშე თუალთა ჩუენტა.

ტროპარი, კჳაა 2

იქმენ მოწაფე ქრისტჳსი, საღმრთოთა მოციქულთა კრებულსა თანა აღრაცხულ, ხოლო ურწმუნოებითა ქრისტეს აღდგომაა გამოიძიე, და მისისა პატიოსნისა ვნებისა განხილვითა, ირწმუნე, თომა, ყოვლად ქებულო, და აწ გვითხოვე ჩუენ მშვიდობაა და დიდი წყალობაა.

დიდებაა მამასა და ძესა და წმიდასა სულსა.

ტროპარი

მოციქულო წმიდაო თომა, ევედრე მოწყალესა ღმერთსა, რათა ცოდვათა შენდობაა მოგვანიჭოს და სულთა ჩუენტა დიდი წყალობაა.

აწ და მარადის და უკუნითი უკუნისამდე, ამინ.

არასადა დავსდუმნეთ, ღმრთისმშობელო, ძლიერებათა შენთა ქებად, უღირსნი ესე მონანი შენნი. რამეთუ არათუმცა შენ გვფარევიდ ოხითა შენითა, ვინმცა სადა გჳკსნნა ჩუენ ესოდენტა ჭირთაგან; ანუ ვინმცა დაგვიცვნა ჩუენ აქამომდე ფლობილად? არასადა განგეშორნეთ ჩუენ, დედოფალო კურთხეულო, რამეთუ შენ იკსნი სულთა ჩუენტა ყოველთა განსაცდელთაგან.

მიწყალე მე, ღმერთო, დიდითა წყალობითა შენითა და მრავლითა მოწყალებითა შენითა აღკოცე უსჯულოებაა ჩემი. უფროაჲს განმბანე მე უსჯულოებისა ჩემისაგან და ცოდვათა ჩემთაგან განმწმიდე მე, რამეთუ უსჯულოებაა ჩემი მე უწყი, და ცოდვამ ჩემი წინაშე ჩემსა არს მარადის. შენ მხოლოსა შეგცოდე და ბოროტი შენ წინაშე ვყავ, რათა განმართლდე სიტყუათაგან შენთა და სძლო სჯასა შენსა, რამეთუ ესერა, უსჯულოებათა შინა მიუდგა და ცოდვათა შინა მშვა მე დეღამან ჩემმან. რამეთუ ესერა, ჭეშმარიტებაა შეიყუარე, უჩინონი და დაფარულნი სიბრძნისა შენისანი გამომიცხადენ მე. მასხურო მე უსუპითა და განვწმიდნე მე, განმბანო მე და უფროაჲს თოვლისა განვსაპეტაკენე. მასმინო მე გალობაა და სიხარული და იხარებდენ ბუალნი დამდაბლებულნი. გარე მიაქციე პირი შენი ცოდვათა ჩემთაგან და ყოველნი უსჯულოებანი ჩემნი აღკოცენ. გული წმიდაა დაჰბადე ჩემ თანა, ღმერთო, და სული წრფელი განმიხსლე გუამსა ჩემსა. ნუ განმაგდებ მე პირისა შენისაგან და სულსა წმიდასა შენსა ნუ მიმიღებ ჩემგან. მომეც მე სიხარული მაცხოვარებისა შენისაა და სულითა მთავრობისაათა დამამტკიცე მე. ვასწავლნე უსჯულოთა გზანი შენნი და უღმრთონი შენდა მოიქცენ. მიკსენ მე სისხლთაგან, ღმერთო, ღმერთო ცხორებისა ჩემისაო; იხარებდეს ენაა ჩემი სიმართლესა შენსა. უფალო, ბაგენი ჩემნი აღახუენ, და პირი ჩემი უთხრობდეს ქებულებასა შენსა. რამეთუ უკეთუმცა გენება, მსხუერპლი შე-მცა-მეწირა, არამედ საკუერთხი არა გთნდეს. მსხუერპლი ღმრთისა არს სული

შემუსრვილი, გული შემუსრვილი და დამდაბლებული ღმერთმან არა შეურაცხ-ჰყოს. კეთილი უყავ, უფალო, ნებითა შენითა სიონსა და აღეშენენ ზღუდენი იერუსალჴმისანი. მაშინ გონდეს მსხუერპლი სიმართლისაჲ, შესაწირავი და ყოვლად-დასაწუელი, მაშინ შეიწირენ საკურთხეველსა შენსა ზედა ზუარაკნი.

გალობაჲ 1, უგალობდითსა, კმაჲ 4

ძლისპირი: დაანთქენ ვნებანი სულისა ჩემისანი სიღრმეთა ვნებათა ძლევისასა, უფალო, ქალწულისაგან შობილო, ვითარ დაანთქ ძლიერებაჲ აღჭურვილთა სპარეზენტაჲ, და გიგალობდეს შენ ძლევისა ებნითა.

წმიდაო თომა მოციქულო, ევედრე ღმერთსა ჩუენთჳს

ღირსად პატივს-გცემთ შენ, ვითარცა ქრისტეს მოციქულსა, და გვედრებით ოხასა წინაშე ჯუარცუმულისა ღმრთისა და მაცხოვრისა ჩუენისა, რაჲთა განგვწმიდოს ცოდვათაგან და აღგვჭუროს მღვიძარებითა საღმრთოჲთა.

წმიდაო თომა მოციქულო, ევედრე ღმერთსა ჩუენთჳს

გიგალობთ შენ, ვითარცა თუალით მზილველსა და კელით-მსახურსა ქრისტჴსა, და აღგძრავთ მწედ მისა მიმართ, რაჲთა დაგვიფაროს ბოროტისა მახეთაგან და გუღნი ჩუენნი დაამტკიცოს სარწმუნოებასა ზედა ჴემმარიტსა.

დიდებაჲ მამასა და ძესა და წმიდასა სულსა

იხარებს ქრისტეს ეკლესიაჲ და გვიწესს კსენებასა შენსა, რაჲთა საკურველსა მას ლუაწლსა შენსა ვაქებდეთ, ყოვლად დიდებულო მოციქულო, და გვედრებოდეთ კსნასა ყოველთა სენტა და ვნებათაგან.

აწ და მარადის და უკუნითი უკუნისამდე, ამინ.

სიკუდილი და ზრწნილებაჲ დაქსენ ღმრთისა დედაო, ჰშევ რაჲ წყაროჲ უზრწნელებისაჲ, ქრისტე, ყოვლად უბიწოო ღმრთისმშობელო, რომელმან განაშვენა კაცთა გონებაჲ შენ მიერ უკუდავებისა სიკეთითა.

გალობაჲ 3, განძლიერდასა

ძლისპირი: არა სიბრძნითა, არცა ძალითა, არცა სიმდიდრითა თავით თჳსით ვიქადით, არამედ შენგან, ღმრთისა სიბრძნეო, რაჲეთუ არავინ არს წმიდაჲ შენებრ, კაცთ-მოყვარე.

წმიდაო თომა მოციქულო, ევედრე ღმერთსა ჩუენთჳს

აღმოსცენდი რაჲ გალილეას, სიყრმითგან ეძიებდი ჴემმარიტებასა, და მოგიწოდა რაჲ ქრისტემან საღმრთოსა სარბიელსა ზედა, ნადირობაჲ თევზთაჲ დაუტევე და შეუდეგ კორცითა გამოჩინებულსა ღმერთსა.

წმიდაო თომა მოციქულო, ევედრე ღმერთსა ჩუენთჳს

თანამოგზაურ იქმენ რაჲ ქრისტეს მიმოსლვისა, ერთგულებისათჳს შეგრაცხა ათთორმეტთა თანა მოციქულთა და წადიერ იყავ მისთანა სიკუდილისა, აწ ჩუენცა აღგვძარ მკედრობად ღმრთისა.

დიდებაჲ მამასა და ძესა და წმიდასა სულსა.

მოვლეთ რაჲ იუდეა და გალილეაჲ, თჳთმზილველ იყავ არა ხოლო თუ ქუეყნიერთა საქმეთა და სასწაულთა ქრისტჴსთა, არამედ ვნებათა მისთა და ნებსით სიკუდილისა.

აწ და მარადის და უკუნითი უკუნისამდე, ამინ.

უქორწინებელო სძალო, რომელმან შეგ ღმერთი კორციელ-ქმნილი, ვნებათა კვეთებითა შერყეული ესე დამამტკიცე, რაჲეთუ სიმტკიცე ხარ და სასოჲ სოფლისაჲ.

გვკენ განსაცდელთაგან მონანი შენნი, ყოვლადწმიდაო ღმრთისმშობელო ქალწულო, რამეთუ ჩუენ ყოველნი, შემდგომად ღმრთისა, შენდა მოვკლტით, ვითარცა უძლეველისა ზღუდისა და შუამდგომელისა.

მოიხილე ჩუენზედა, ყოვლადქებულო ღმრთისმშობელო, და კორცთა ჩუენტა წყლულებანი ბოროტნი განკურნენ და სულისა ჩუენისა სნეულებანი.

მღდელი: შეგვწყალენ ჩუენ, ღმერთო, დიდითა წყალობითა შენითა, გევედრებით, ისმინე და შეგვწყალენ.

გუნდი: უფალო, შეგვწყალენ (3-გზის).

მღდელი: მერმეცა გევედრებით ღმრთივდაცულისა ერისა ჩუენისა და მეუფებისა მისისათჳს (ქრისტწსმოყუარისა მთავრობისა და მკედრობისა მისისათჳს).

გუნდი: უფალო, შეგვწყალენ (3-გზის).

მღდელი: მერმეცა გევედრებით უწმიდესისა და უნეტარესისა, სრულიად საქართველოს კათოლიკოს-პატრიარქისა, მცხეთა-თბილისის მთავარეპისკოპოსისა და ბიჭვინთისა და ცხუმ-აფხაზეთის მიტროპოლიტისა, დიდისა მეუფისა, მამისა ჩუენისა ილიასათჳს, და ყოვლადუსამღდელოესისა (აქა მოიხსენეთ ადგილობრივი მღდელთმთავარი), და ყოველთა ქრისტწს მიერ ძმათა ჩუენტათჳს.

გუნდი: უფალო, შეგვწყალენ (3-გზის).

მღდელი: მერმეცა ვევედრნეთ უფალსა ღმერთსა ჩუენსა, რაათა შეიწყალნეს... (აქა მოიხსენეთ სახელდებით ისინი, ვისთვისაც ვევედრებით ღმერთსა).

გუნდი: უფალო, შეგვწყალენ (3-გზის).

მღდელი: განამრავლე, უფალო, ჟამნი და წელნი ცხორებისა მათისანი და იქსნენ იგინი, უფალო, ყოვლისაგან ჭირისა, რისხვისა და იწროებისა, და ყოვლისაგან წყლულებისა სულისა და კორცთაჲსა და მიუტევენ მათ ყოველი შეცოდებანი მათნი, ნებსითნი და უნებლიეთნი.

გუნდი: უფალო, შეგვწყალენ (3-გზის).

მღდელი: მერმეცა გევედრებით ყოველთა ძმათა და ყოველთა ქრისტეანეთათჳს.

გუნდი: უფალო, შეგვწყალენ. (3-გზის).

მღდელი: რამეთუ მოწყალე და კაცთმოყუარე ღმერთი ხარ, და შენდა დიდებასა აღვაკლენთ, მამისა, და ძისა, და წმიდისა სულისა, აწ და მარადის, და უკუნითი უკუნისამდე.

გუნდი: ამინ.

წარდგომაჲ, კმაჲ 8

დაუტევე რაჲ ნადირობაჲ თევზთაჲ ზღვასა შინა, ბადითა სიტყუათა შენთაჲთა სიტყუერნი თევზნი მონადირენ და შესწირენ მსხუერპლად მაცხოვარსა და სურვილითა მისითა მობაძავ იქმენ ვნებათა მისთა, ამისთჳსცა შემოკრებულნი ესე ღირსად პატივს ვსცემთ, დიდებულო, კსენებასა შენსა, და ერთობით გილაღადებთ: წმიდაო მოციქულო თომა, ვევედრე ქრისტესა ღმერთსა, რაათა განგვაძლიეროს წინა-აღმდგომთა მისთა მიმართ და დაგვიფაროს ყოველთა განსაცდელთა და სენთაგან.

გალობაჲ 4, უფალო მესმასა

ძლისპირი: იესუ, მჯდომარე დიდებით საყდართა ღმრთეებისათა, მოვიდა ღრუბლითა სულმცირითა, რომელ არს ქალწული გამოუცდელი კსნად ჩუენდა, მღალადებელთა: დიდებაჲ ძალსა შენსა, მკსნელო ჩუენ ყოველთაო.

წმიდაო თომა მოციქულო, ევედრე ღმერთსა ჩუენთჳს

შემდგომად აღდგომისა ქრისტემან წყლულებაჲ გუერდისაჲ აჩუენა რაჲ მოწაფეთა თჳსთა და არწმუნა კელმწიფებაჲ თჳსი შესლვითა ბჭეთა კშულთათა, მექსეულად ჰბერა სული წმიდაჲ, და უბრძანათ ქადაგებაჲ სასუფეველისაჲ კიდეთა ქუეყანისათა.

წმიდაო თომა მოციქულო, ევედრე ღმერთსა ჩუენთჳს

გახარეს რაჲ მოციქულთა, ყოვლადნეტარო: „ვიხილეთ ჩუენ უფალი, აღგომილი მკუდრეთით“, გულსა შინა თჳსსა ზრახავდი, თომა: „მე ხოლო ვიპოვეა უსჯულოჲ და არაწმიდაჲ, არა ღირს ვიყავ რაჲ ხილვად მისა?“.

დიდებაჲ მამასა და ძესა და წმიდასა სულსა.

ვერა იხილე რაჲ მკუდრეთით აღმდგარი მაცხოვარი, შეძრწუნებული ტირილითა ეტყოდი სხუათა მათ მოწაფეთა უფლისათა: „ვიდრე არა ვიხილნე სახენი სამჭუალთა მისთანნი, არასადა მრწმენეს უფალი, აღდგომილი მკუდრეთით“.

აწ და მარადის და უკუნითი უკუნისამდე, ამინ.

ქუეყანად დაუთესველად, ცხორების გამოძებელად, და ღრუბლად სულ-მცირედ მომფენელად ცუარსა მშვიდობისასა, ყოვლადწმიდასა ქალწულსა აღვიარებთ და ვლალადებთ: ღმრთისა დედაო. დიდებაჲ ძესა შენსა.

გალობაჲ 5, ღამითგანსა

ძლისპირი: უღმერთოთა ვერ იხილონ დიდებაჲ შენი, ქრისტე, ხოლო ჩუენ, მონანი შენნი, ვიხილავთ დიდებასა შენსა, და ვლალადებთ: ღამითგან აღვიმსთობთ ჩუენ მგალობლად შენდამი, კაცთ-მოყუარე.

წმიდაო თომა მოციქულო, ევედრე ღმერთსა ჩუენთჳს

აღვისრულა რაჲ ვედრებაჲ ქრისტემან, კუალად გამოგიჩნდათ და მოგცათ რაჲ მშუდობაჲ, წყლულებაჲ გუერდისაჲ და სახენი სამსჭუალთანი გაჩუენა შენ, წმიდაო, და გრქუა: „აჰა, იხილენ, და გრწმენინ“.

წმიდაო თომა მოციქულო, ევედრე ღმერთსა ჩუენთჳს

უხრწნელი გვერდი მეუფისა კელითა გამოიძიე და იხილე რაჲ წყლულებაჲ სამსჭუალთაჲ და ლახურისაჲ, სიხარულითა ღალატ-ყავ: „უფალი ჩემი და ღმერთი“, ხოლო იგი გეტყოდა: „ნეტარ იყვენ, რომელთა არა უხილავ მე და ჰრწმენეს“.

დიდებაჲ მამასა და ძესა და წმიდასა სულსა.

ქრისტეს აღდგომასა ნათლით-შემოსილსა, დასაბამსა უხრწნელებისასა უგალობდით რაჲ მოციქულნი, ორმეოცთა დღეთა გერწმენებოდით და გეტყოდით სასუფეველისათჳს ღმრთისა, და გამცნებდით: „ნუ განეშორებით იერუსალჴმსა“.

აწ და მარადის და უკუნითი უკუნისამდე, ამინ.

მძლედ გამოაჩინე შენ, ღმრთისმშობელო, გონებაჲ ჩემი, და დაუმორჩილენ ვნებულნი გულისსიტყუანი და კორცთა ბრძოლანი, რომელმან ჰშევ თავადი იგი საღმრთო უვნებლობაჲ.

გალობაჲ 6, ღალადყავსა

ძლისპირი: გალობით, კმითა სიხარულისათა გაქებდა ეკლესიაჲ შენი, ქრისტე, განწმდა რაჲ იგი, სისხლითა მავით, რომელიცა გარდამოხდა გვერდსა საღმრთოსა, წმიდასა.

წმიდაო თომა მოციქულო, ევედრე ღმერთსა ჩუენთჳს

გაუწყათ რამ ახალკურიაკში აღდგომისა თვისისაჲ ქრისტემან, მრავალნი სხუანიცა სასწაულნი ქმნა, და განამტკიცნა გულნი თქუენნი განათლებად ყოველთა წარმართთა და ამაღლდა ზეცად.

წმიდაო თომა მოციქულო, ევედრე ღმერთსა ჩუენთს

ჭურეტდით რამ ქრისტეს დიდებულსა ამაღლებასა, სული წმიდაჲ მოგივლინათ სახედ ცეცხლისა და იწყეთ სიტყუად უცხოთა ენათა, რამთა ყოველთა მიუთხრობდეთ დიდებასა მისსა.

დიდებაჲ მამასა და ძესა და წმიდასა სულსა.

წილისყრასა მას მოციქულთასა წილად გზვდა რამ მოქცევაჲ ჰინდოთაჲ, არა გენება წარსლვაჲ მხარესა მას შორიელსა, გარნა გეჩვენა შენ ქრისტე და აღვითქუა შეწევნაჲ.

აწ და მარადის და უკუნითი უკუნისამდე, ამინ.

უაღრეს და უზესთაეს არს ყოველთა სასწაულთა ქალწულისა მუცლადლებაჲ დამბადებელისა, და შემდგომადცა შობისა მის უბიწოებით დადგრომა ქალწულადვე.

გვკსენ განსაცდელთაგან მონანი შენნი, ყოვლადწმიდაო ღმრთისმშობელო ქალწულო, რამეთუ ჩუენ ყოველნი, შემდგომად ღმრთისა, შენდა მოვკლტით, ვითარცა უძლეველისა ზღუდისა და შუამდგომელისა.

მოიხილე ჩუენზედა, ყოვლადქებულო ღმრთისმშობელო, და კორცთა ჩუენთა წყლულებანი ბოროტნი განჰკურნენ და სულისა ჩუენისა სნეულებანი.

მღდელი: მერმე და მერმე მშუდობით უფლისა მიმართ ვილოცოთ.

გუნდი: უფალო, შეგვწყალებ.

მღდელი: შეგუეწინ, გუაცხოვნენ, შეგვწყალებ და დაგვცვენ ჩუენ, ღმერთო, შენითა მადლითა.

გუნდი: უფალო, შეგვწყალებ.

მღდელი: ყოვლადწმიდისა, უზრწნელისა, უფროსად კურთხეულისა, დიდებულისა დედოფლისა ჩუენისა ღმრთისმშობელისა, და მარადის ქალწულისა მარიაამისა, და ყოველთა წმიდათა მომკსენებელთა, თავნი თვისნი და ურთიერთარს, და ყოველი ცხორებაჲ ჩუენი ქრისტესა ღმერთსა ჩუენსა შევედროთ.

გუნდი: შენ, უფალო.

მღდელი: რამეთუ შენ ხარ მეუფე მშუდობისაჲ, და მაცხოვარი სულთა ჩუენთაჲ, და შენდა დიდებასა აღუავლენთ მამისა, და ძისა, და წმიდისა სულისა, აწ და მარადის, და უკუნითი უკუნისამდე.

გუნდი: ამინ.

კონდაკი, კმაჲ 4

ვითარცა სიბრძნისა მადლითა აღვსებულმან, და ქრისტეს მოციქულმან, და მსახურმან საკურველმან, სინანულითა დაღაღ-ჰყავ: „შენ ხარ ღმერთი ჩემი და უფალი ჩემი“.

იკოსი

ეჰა დიდებული ეგე საკურველი, უფლისა მოწაფეო, და დიდისა საიდუმლოჲსა მომლებო, თომა ღმრთისმეტყველო, რაჟამს პეტრე დაღადყო რამ: ვინილეთ უფალი, არქუ მას: „უკეთუ არა ვინილო წყლულებაჲ კელთა მისთა არა მრწმენეს“, და მაშინ კმა-გიყო უფალმან მარჩბივსა და გრქუა: „მოჰყვენ კელნი შენნი და დასდევ გვერდსა ჩემსა, და ნუ იქნები ურწმუნო, რამეთუ მე ვარ უფალი და ღმერთი შენი“, და შენცა სინანულით კმა ჰყავ: „შენ ხარ ღმერთი ჩემი, და უფალი ჩემი“.

მღდელმან: მოხედენ, სიბრძნით.

წარდგომა სახარებისა, კმაჲ 4: ყოველსა ქუეყანასა განხდა კმაჲ მათი და კიდეთა სოფლისათა სიტყუანი მათნი.

მუხლი: ცანი უთხრობენ დიდებასა ღმრთისასა და ქმნულსა კელთა მისთასა მიუთხრობს სამყაროჲ.

მღვდელმან: უფლისა მიმართ ვილოცოთ.

გუნდი: უფალო, შეგვწყალებ.

მღვდელმან: რამეთუ წმიდა ხარ შენ, ღმერთო ჩუენო, და რომელი წმიდათა შორის განისუენებ, და შენდა დიდებასა აღვაველებთ, მამისა, და ძისა და წმიდისა სულისა, აწ და მარადის, და უკუნიითი უკუნისამდე,

გუნდი: ამინ.

მღვდელმან: ყოველი სული აქებდით უფალსა.

მუკლი: აქებდით ღმერთსა წმიდათა შორის მისთა, აქებდით მას სამყაროთა ძალისა მისისათა.

მღვდელმან: ღირს-ყოფად ჩუენდა სმენად წმიდისა სახარებისა უფალსა ღმერთსა ჩუენსა ვევედრნეთ.

გუნდი: უფალო, შეგვწყალებ. (3-გზის)

მღვდელმან: სიბრძნით აღემართენით და ისმინეთ წმიდაჲ სახარებაჲ, მშუდობაჲ ყოველთა.

გუნდი: და სულისაცა შენისა თანა.

მღვდელმან: იოანესაგან წმიდისა სახარებისა საკითხავი.

გუნდი: დიდებაჲ შენდა, უფალო, დიდებაჲ შენდა.

მღვდელმან: მოხედენ.

სახარებაჲ იოანესი (თ.20-19-31)

მას ჟამსა შინა, ვითარცა შემწუხრდა დღე იგი ერთშაბათისაჲ მის, და კარნი იგი დაკშულ იყვნეს, სადა-იგი იყვნეს მოწაფენი შეკრებულ შიშისათჳს ჰურიათაჲსა, მოვიდა იესუ და დადგა შორის მათსა და ჰრქუა მათ: მშუდობაჲ თქუენ თანა! და ვითარცა ესე თქუა, უჩუენა მათ კელნი თჳსნი და გუერდი მისი. და განიხარეს მოწაფეთა, იხილეს რაჲ უფალი. რქუა მათ იესუ კუალად: მშუდობაჲ თქუენ თანა! ვითარცა მომავლინა მე მამამან, მეცა წარგავლინებ თქუენ. და ვითარცა ესე თქუა შეჰბერა მათ და რქუა: მიიღეთ სული წმიდაჲ. უკუეთუ ვიეთნიმე მიუტევენთ ცოდვანი, მიეტევენ მათ; და უკუეთუ ვიეთნიმე შეიპყრნეთ, შეპყრობილ იყვნენ. ხოლო თომა, ერთი იგი ათორმეტთაგანნი, რომელსა ერქუა მარჩბივ, არა იყო მათ თანა, ოდეს-იგი მოვიდა იესუ. უთხრობდეს მას სხუანი იგი მოწაფენი, ვითარმედ: ვიხილეთ ჩვენ უფალი. ხოლო მან ჰრქუა მათ: უკუეთუ არა ვიხილო კელთა მისთა სახე იგი სამსჭუალთაჲ და დავსხნე თითნი ჩემნი ადგილსა მას სამსჭუალთასა და დავსდვა კელი ჩემი გუერდსა მისსა, არასადა მრწმენეს. და შემდგომად რვისა დღისა კუალად იყვნეს მოწაფენი მისნი შინაგან, და თომაცა მათ თანა. და შევიდა იესუ კართა კშულთა და დადგა შორის მათსა და ჰრქუა მათ: მშუდობაჲ თქუენ თანა! მერმე ჰრქუა თომას: მოყვენ თითნი შენნი და იხილენ კელნი ჩემნი და მოიღე კელი შენი და დამდეგ გუერდსა ჩემსა და ნუ იყოფი ურწმუნო, არამედ გრწმენინ. მიუგო თომა და ჰრქუა: უფალი ჩემი და ღმერთი ჩემი! ჰრქუა მას იესუ: რამეთუ მიხილე და გრწამს; ნეტარ არიან, რომელთა არა უხილავ და ვჰრწმენე. მრავალნი სხუანიცა სასწაულნი ქმნნა იესუ წინაშე მოწაფეთა თჳსთა, რომელნი არა დაწერილ არიან წიგნსა ამას. ხოლო ესე დაიწერა, რამეთუ გრწმენეს, რამეთუ იესუ არს ქრისტე, ძე ღმრთისაჲ, და რამეთუ გრწმენეს და ცხობრებაჲ გაქუნდეს სახელითა მისითა.

გუნდი: დიდებაჲ შენდა, უფალო, დიდებაჲ შენდა.

დიდება მამასა და ძესა და წმიდასა სულსა.

მეოხებითა წმიდისა თომა მოციქულისაჲთა, მოწყალეო, აღკოცენ ცოდვათა ჩუენთა სიმრავლენი.

აწდა მარადის და უკუნითი უკუნისამდე, ამინ.

მეოხებითა წმიდისა ღმრთისმშობელისაჲთა, მოწყალეო, აღკოცენ ცოდვათა ჩუენთა სიმრავლენი.

მიწყალე მე, ღმერთო, დიდითა წყალობითა შენითა, და მრავლითა მოწყალებითა შენითა აღკოცენ უშჯულოებაჲ ჩემი და შემიწყალე მე, ღმერთო.

გერი: ყოვლად ნეტარო ქრისტეს მოციქულო თომა, მის მიერ გამორჩეულო სამწყსოსათჳს თჳსისა და მქადაგებულო ჭეშმარიტებისაო, აწ ჩუენცა გვითხოვე მისგან მშჯლობაჲ სოფლისაჲ, შეუძრველად დაცვაჲ ეკლესიისა და ერისა ჩუენისაჲ, და სულთა ჩუენთათჳს დიდი წყალობაჲ.

მღდელი: აცხოვნე, ღმერთო, ერი შენი, და აკურთხე სამკუდრებელი შენი, მოხედენ სოფელსა შენსა წყალობითა და მოწყალებითა, აღამაღლე რქაჲ ქრისტეანეთა მართლმადიდებელთაჲ, და გარდამოავლინენ ჩუენ ზედა მდიდარნი წყალობანი შენნი, მეოხებითა ყოვლადწმიდისა დედოფლისა ჩუენისა ღმრთისმშობელისა, და მარადის ქალწულისა მარიამისაჲთა; ძლიერებითა პატიოსნისა და ცხოველსმყოფელისა ჯუარისაჲთა; მეოხებითა პატიოსანთა უკორცოთა ზეცისა ძალთაჲთა; პატიოსნისა, დიდებულისა, წინაჲსწარმეტყუელისა, წინამორბედისა და ნათლისმცემელისა იოვანწსითა; წმიდისა დიდისა წინაჲსწარმეტყუელისა ელია თეზბიტელისა და მართლისა ენუქისითა; წმიდათა დიდებულთა, და ყოვლად-ქებულთა მოციქულთა თავთა, პეტრწსა და პავლწსითა, და საქართველოს განმანათლებელთა მოციქულთა: ანდრია პირველწოდებულისა, სვიმონ კანანელისა, ბართლომესი, თადეოზისა და მატათაჲსითა; წმიდათა შორის მამათა ჩუენთა, და მსოფლიოთა დიდთა მოძღუართა და მღდელთმთავართა: ბასილი დიდისა, გრიგოლი ღმრთისმეტყუელისა, და იოვანე ოქროპირისაჲთა; წმიდათა შორის მამისა ჩუენისა ნიკოლოზ მირონ-ლუკიის მთავარეპისკოპოსისა და საკურველთმოქმედისაჲთა; წმიდისა ძლევა-შემოსილისა მოწამისა გიორგისა და წმიდათა დიდთა ქალწულ-მოწამეთა ბარბარწსა და მარინწსითა; ღირსისა დედისა ჩუენისა, მოციქულთა სწორისა ქალწულისა ნინო ქართველთ განმანათლებელისა და წმიდისა პატრიარქისა ევსტათი ანტიოქიელისა - ქართლის ეკლესიათა მაკურთხეველისაჲთა; წმიდათა მოციქულთა სწორთა: მეფისა მირიანისა და დედოფლისა ნანაჲსითა; წმიდათა მამამთავართა ჩუენთა: პეტრე, სამუელ, სარმიან, მამაჲ, არსენ, მელქისედეკ, იოანე-ოქროპირ, ნიკოლოზ, ევდიმოზ, იოსებ, კირიონ, ამბროსისაჲთა; ღირსისა მამისა ჩუენისა იოვანე ზედაზნელისა და ათორმეტთა მისთა მოწაფეთაჲთა; ღმრთივ-განბრძნობილთა ნეტართა მამათა ჩუენთა: ილარიონ ქართველისა, სერაპიონ ზარზმელისა, გრიგოლ ხანძთელისა და საბა იშხნელისაჲთა; ღირსთა მამათა ჩუენთა ათონელთა: იოვანე და გაბრიელ ქართველთა, იოვანე თორნიკ-ყოფილისა და ეფთჳმე და გიორგი მთაწმინდელთაჲთა; წმიდათა დიდებულთა და ღუაწლისა-მძლეუთა მოწამეთა ჩუენთა: რაჟდენისა, ევსტათი მცხეთელისა, ჰაბო ტფილელისა, გობრონისა, თევდორე მღდლისა, ქრისტეფორე გურულისა, ნიკოლოზ დვალისა, კოზმანისა, არგვეთისა მთავართა დავით და კონსტანტინწსა და კონსტანტინე მთავრისაჲთა; წმიდისა მთავარ-მოწამისა ბიძინასა და წმიდათა დიდებულთა მოწამეთა: შალვა და ელიზბარ ქსნის ერისთავთაჲთა; წმიდისა მოწამისა შალვა ახალციხელისა და წმიდათა ათთა-ბევრთა მოწამეთა, ტფილისს ხუარაზმელთაგან მოწყუედილთაჲთა; წმიდათა მოწამეთა ექვსი ათასთა გარეჯელთა ბერთა, და მრავალთა წმიდათა მამათა და დედათა, ქვაბთახევსა და აჭარასა შინა უსჯულოთაგან წამებულთაჲთა; წმიდათა ღუაწლისამძლეუთა მეფეთა და დედოფალთა: მირდატ, აშოტ, არჩილ, დემეტრე, ლუარსაბ, შუშანიკ და ქეთევანისაჲთა; წმიდათა კეთილ-მორწმუნეთა და დიდთა მეფეთა ჩუენთა: ვახტანგ გორგასალისა, დავით აღმაშენებელისა, დემეტრე-დამიანწსა, თამარისა და სოლომონისაჲთა; წმიდისა ილია მართლისა და ექვთიმე ღმრთისკაცისაჲთა; წმიდათა აღმსარებელთა მამათა ჩუენთა - იოვანე და გიორგი-იოანე ბეთანიელთა, და ექვთიმე და გაბრიელ სალოსისაჲთა; წმიდათა და მართალთა მშობელთა ღმრთისაჲთა იოაკიმ და ანნაჲსითა (და წმიდისა სახელი, რომლისა არს ტადარი და დღის წმიდანი მოიხსენიოს); და წმიდისა თომა მოციქულისა და ყოველთა წმიდათა შენთაჲთა გევედრებით შენ, მრავალ-მოწყალეო ღმერთო, შეისმინე ჩუენ ცოდვილთა ვედრებაჲ, და შეგვწყალენ ჩუენ.

გუნდი: უფალო, შეგვწყალენ (12-გზის).



მღდელი: წყალობითა და მოწყალებითა და კაცთმოყუარებითა მხოლოდშობილისა ძისა შენისაათა, რომლისა თანა კურთხეულ ხარ, თანა ყოვლადწმიდით, სახიერით, და ცხოველსმყოფელით სულით შენითურთ, აწ და მარადის და უკუნითი უკუნისამდე.

გუნდი: ამინ.

გალობა 7, კურთხეულარსა

ძლისპირი: საკუმილსა შინა, აბრაამიანნი ყრმანი მოგუთა მიერ კრულნი საღმრთოთა სჯულთათჳს შეითხივნეს და აღსა შინა ღაღადებდეს: კურთხეულ ხარ, ღმერთო, ტადარსა ამას სიწმიდისა შენისასა.

წმიდაო თომა მოციქულო, ევედრე ღმერთსა ჩუენთჳს

საღმრთოთა განგებულებითა შთასრული ჰინდოეთსა, ვითარცა ხუროთმოძღუარი მეფისა მათისაჲ, ნაცვლად პალატთა შენებისა, ოქროსა მისსა მისცემდი გლახაკთა და ქადაგებდი ქრისტესა. მას ევედრე, აწ ჩუენცა გვკსნნეს სულთა და კორცთა ვნებათაგან.

წმიდაო თომა მოციქულო, ევედრე ღმერთსა ჩუენთჳს

წარგადგინეს რაჲ წინაშე მეფისა, აუწყებდი სასახლისა აღშენებასა ცათა შინა, და განრისხებულმან შთაგაგდო რაჲ დილეგსა, დაშვებითა ღმრთისაათა მოკუდა ძმაჲ მისი, და აჩუენეს მას პალატნი მეფისაჲ სასუფეველსა.

დიდებაჲ მამასა და ძესა და წმიდასა სულსა.

ჴ, შეწვენაჲ ღმრთისაჲ სათნომყოფელთა მისთა, რამეთუ კაცისა მის სული უკუნ-აქციეს რაჲ კორცსა, ყოველსავე აუწყებდა ძმასა, და აღიარეს რაჲ ქრისტე, ნათელს სცემდი მათ ერთა თანა, წმიდაო, და ასწავებდი ქრისტეანულსა ცხორებასა.

აწ და მარადის და უკუნითი უკუნისამდე, ამინ.

სჯულისა მისგან მონებისა გვკსნა შობამან შენმან, ღმრთისმშობელო, რამეთუ შენ ქალწულწებითა შეგ განმათავისუფლებელი, კურთხეულ ხარ დედათა შორის, სძალო, ყოვლადწმიდაო.

გალობა 8, აკურთხევდითსა

ძლისპირი: ყრმანი ბრწყინვალენი საკუმილისაგან პირველად იქსნნა შობამან ქალწულისაგან, რომლითა მოასწავა კსნაჲ ჩუენი საცთურისაგან, და ნათლითა შემოსილნი მათ თანა ვიტყოდეთ: უფალსა უგალობდით ყოველნი და უფროჲსად ამაღლებდით მას უკუნისამდე.

წმიდაო თომა მოციქულო, ევედრე ღმერთსა ჩუენთჳს

ვითარცა ურწმუნო ქმნულსა გარწმუნა ქრისტემან აღდგომაჲ თჳსი, ეგრეთვე მიზეზითა შენითა განცხადებულ ყო ზეცად მიცვალებაჲ წმიდისა დედისა მისისაჲ, და აჰა, აწ ვითარცა გაქუს კადნიერებაჲ წინაშე მისა, გვითხოვე აღორძინებაჲ ყოვლითავე სულიერითა და კორციელითა კეთილითა.

წმიდაო თომა მოციქულო, ევედრე ღმერთსა ჩუენთჳს

გახვედ რაჲ ქადაგებად პალესტინესა და შუამდინარეთსა, ურწმუნოებისა ბნელსა შინა დანთქმულთა განუცხადებდი ქრისტეს ღმრთისა მკსნელსა ნათელსა, აწ ჩუენთჳსცა ევედრე მას, ნეტარო, რაჲთა განგეწმიდოს ცოდვათაგან და აღგვჭუროს მღვიძარებითა საღმრთოთა.

დიდებაჲ მამასა და ძესა და წმიდასა სულსა.

კუალად წარემართე რაჲ ჰინდოეთსა, ახარე სასუფეველი ღმრთისაჲ ქუეყანასა მას დამკვდრებულთა პართთა, მიდიელთა და გირკანელთა, და ქრისტეს მიმართ მოაქცევდი რაჲ ბაქტრიელთა და ბრაჰმანთა, წარმართობითა დაბნელებული გონებაჲ ჰინდოთაჲ განაბრწყინვენ მადლითა სულისა წმიდისაათა.

აწ და მარადის და უკუნითი უკუნისამდე, ამინ.

ჰმევ შენ წმიდაა ყოვლისაგან ბიწისა, იქმენ სამკუდრებელ ყოვლისა სიწმიდისა და სიტყუა ყოველთა წმიდა მყოფელი, მამისა თანა დაუსაბამოა უშევ კაცთა, ამისთვის გიგალობთ შენ, ქალწულო, და უფროადა აღგამაღლებთ უკუნისამდე.

გალობა 9, ადიდებდითსა

ძლისპირი: ლოდი საკიდური უკელოდ გამოეკვეთა შენგან, მთაო, გამოუკვეთელი, ქალწულო, ქრისტე შემაერთებელი ბუნებათა, ამისთვის სიხარულით ჩუენ მორწმუნენი ღირსად გადიდებთ.

წმიდაო თომა მოციქულო, ევედრე ღმერთსა ჩუენტვს

იქადაგე რაა კალამინსა, ქრისტეს მიმართ მოაქციე სახლეულნი მეფისა, და განრისხებულმან გტანჯა რაა განკურებულთა რვალითა, მერმე შთაგადლო აღზებულსა მას საკუმბილსა, და ძალითა ღმრთისაათა დაშთი უვნებელად.

წმიდაო თომა მოციქულო, ევედრე ღმერთსა ჩუენტვს

უბრძანა რაა მეფემან მოკლვამ შენი, ითხოვე ჟამი ლოცვისა, და კელი დაასხი რაა ხუცად სიფორსა და მეფისწულსა აზანსა დიაკონად, ანდერძად დაუდე განმრავლება მორწმუნეთა.

დიდება მამასა და ძესა და წმიდასა სულსა.

სული შენი შეჰვედრე რაა ქრისტესა, განგვირეს მტარვალთა ხუთითა ლახუართა, და გუამი შენი დაკრძალეს რაა მოწაფეთა შენთა პატივითა, ქრისტემან დაგამკუდრა სასუფეველსა თვსსა.

აწ და მარადის და უკუნითი უკუნისამდე, ამინ.

ნაყოფი წმიდაა აღმოსცენდი ქალწულებისა ქუეყანასა, რომლითა ვიზრდებით მორწმუნენი, რომლისა მიერ ვჰვიეთ და ვსცხოვნდებით, ქრისტე, და მშობელსა შენსა, ვითარცა ღმრთისმშობელსა ვადიდებთ.

ღირს არს ჭეშმარიტად, რაათა გადიდებდეთ, შენ, ღმრთისმშობელო, რომელი მარადის სანატრელ იქმენ, ყოვლადუბიწოდ და დედად ღმრთისა ჩუენისა, უპატიოსნესსა ქერობინთასა და აღმატებით უზესთაესსა სერაბინთასა, განუხრწნელად მშობელსა სიტყვსა ღმრთისადასა, მხოლოსა ღმრთისმშობელსა გალობით გადიდებთ.

მღდელი აკმევს:

მკითხველი ან ერისკაცი კითხულობს:

აწ ჩუენცა ვაქებთ ნიშ-სასწაულთა და კურნებათა, რომელნი აღასრულნა ღმერთმან წმიდათა ნაწილთა მიერ შენთა სამარხოთა შენსა, და ეკლესიამან შეგრაცხა რაა წმიდათა შორის მისთა, მას ზედა აღაშენეს შუენიერი ტაძარი, და გევედრებოდენ ქსნასა ყოველთა ჭირთა და ვნებათაგან, გარნა უფლისა დაშვებითა წმიდანნი ნაწილნი შენნი წარიხუნეს შუანდინარეთსა, და მცირს სიწმიდს დარჩა ჰინდოეთსა, რომლისა მიერ მწე-ექმნებოდი მისდა შევრდომილთა, და ვიდრე აქამომდე ქუეყანა იგი, წოდებულ არს ქუეყანად „წმიდისა თომასა“;

წმიდანნი ნაწილნი შენნი კონსტანტინეპოლესა წარიხუნეს რაა განგებულებითა საღმრთოათა, აღაშენებდენ მას ზედა ტაძარსა დიდებულსა და შემდგომად სამეუფოასა მის ქალაქის დაცემისა, დაიუნჯეს ნაწილნი შენნი, მ, წმიდაო თომა მოციქულო, ვითარცა იტალიამან და საბერძნეთმან, ეგრეთცა ათონმან, ივერიამან და უნგრეთმან, ხოლო უკუეთუ ვინმე ლოცვითა მივეახლოთ სიწმიდეთა მათ შენთა, გვკსნი ყოველთა განსაცდელთა და ჭირთაგან.

მადლი შეწევნისა მინიჭებულ აქუს რაა ქრისტსგან წმიდათა მათ ნაწილთა შენთა, წმიდაო, იშუებს აწ დიდებული სიონი დაუნჯებითა წმიდისა თავისა შენისაათა, და აქუს რაა სასოდ და შესავედრებელად დედა-ქალაქსა ჩუენსა და ერსა, დღესასწაულსა მას კსენებისა შენისასა ჩუენცა

მოვსწრაფით სიონად, რაათა სიწმიდს ეგე შენი მკურვალედ შევიტკობთ და მოვილოთ კურნებაა სულთა და კორცთა ჩუენთაა.

იქადის მხარს იმერთაა და იხარებს გელათი მწიაღებელი წმიდათა ნაწილთა შენთა და მიჰმადლებს რაა უხვსა საბოძვარსა ულევისა მადლისასა ყოველთა მისდა მილტოლვილთა, აჰა, აწ ჩუენცა სიხარულითა ვისწრაფვით მიმთხვევად მისდა და გევედრებით: ყოველთა სენთა და ურვათაგან განგვარინე კადნიერთა შუამდგომელობითა შენითა, რომელ გაქუს ვითარცა მოციქულსა ქრისტეს ღმრთისასა.

გაქუს რაა გამოუთქმელი სიმდიდრს წყალობისაა, ყოვლადწმიდაო დედაო ღმრთისა ჩუენისაო, შენდა მოვივლტით და გევედრებით, ვითარცა ურცხვენელსა მეოხსა წინაშე ღმრთისა, მოგუტევოს ყოველნი შეცოდებანი ჩუენნი და დაგვიცვას მანქანებათაგან ეშმაკისა, რაათა ღმრთისმოსავობითა ვსცხონდებოდეთ და სამწმიდაარსობისა გალობითა ვაქებდეთ ღმერთსა, წმიდათა შორის საკურველსა:

წმიდაო ღმერთო, წმიდაო ძლიერო, წმიდაო უკუდაო, შეგუწყალენ ჩუენ (3-გზის).

დიდებაა მამასა და ძესა და წმიდასა სულსა, აწ და მარადის და უკუნითი უკუნისამდე, ამინ.

ყოვლადწმიდაო სამებაო, შეგუწყალენ ჩუენ; უფალო, გუკსენ და გუღხინე ცოდვათა ჩუენთაგან; მეუფეო, შეგუწყალენ უსჯულოებანი ჩუენნი; წმიდაო, მოიხილე და განჰკურნენ უძლურებანი ჩუენნი სახელისა შენისათჳს.

უფალო, შეგუწყალენ (3-გზის).

დიდებაა მამასა და ძესა და წმიდასა სულსა, აწ და მარადის და უკუნითი უკუნისამდე, ამინ

მამაო ჩუენო, რომელი ხარ ცათა შინა, წმიდა იყავნ სახელი შენი, მოვედინ სუფევაა შენი, იყავნ ნებაა შენი, ვითარცა ცათა შინა, ეგრეცა ქუეყანასა ზედა, პური ჩუენი არსობისაა მომეც ჩუენ დღეს, და მომიტევენ ჩუენ თანანადებნი ჩუენნი, ვითარცა ჩუენ მიუტევებთ თანამდებთა მათ ჩუენთა და ნუ შემეყუანებ ჩუენ განსაცდელსა, არამედ მიკსნენ ჩუენ ბოროტისაგან.

მღღელი: რამეთუ შენი არს სუფევაა...

მიწყალენ ჩუენ, უფალო, შემეწყალენ ჩუენ, რამეთუ ყოვლისავე სიტყუს მიცემისაგან უღონო ვართ, გარნა ამას ვედრებასა შენ, მეუფისა სახიერისა, ცოდვილნი ესე შევსწირავთ. მიწყალენ ჩუენ, უფალო, შემეწყალენ ჩუენ.

დიდებაა მამასა და ძესა და წმიდასა სულსა

უფალო, შემეწყალენ ჩუენ, რამეთუ შენ გესავთ, ნუ განმირისხდები ჩუენ ფრიად, და ნუცა მოიკსენებ უსჯულოებათა ჩუენთა, არამედ მოიხილე ჩუენზედა წყალობით, ვითარცა სახიერ ხარ, და გუკსენ ჩუენ სამართლად რისხვისაგან შენისა, რამეთუ შენ ხარ ღმერთი ჩუენი, და ჩუენ ვართ ერნი შენნი, ყოველნივე ქმნულნი კელთა შენთანი ვართ და სახელი შენი წოდებულ არს ჩუენ ზედა და შემეწყალენ ჩუენ.

აწ და მარადის და უკუნითი უკუნისამდე, ამინ.

მოწყალეებისა კარი განგუდე, კურთხეულო ღმრთისმშობელო, რაათა, რომელნი ესე შენ გესავთ, არა დავეცნეთ, არამედ განვერნეთ წინააღმდგომთა მტერთაგან, რამეთუ შენ ხარ ცხორებაა ნათესავისა ქრისტეანეთასა.

მღღელი: შეგუწყალენ ჩუენ, ღმერთო, დიდითა წყალობითა შენითა, გევედრებით, ისმინე და შეგუწყალენ.

გუნდი: უფალო, შეგუწყალენ (3-გზის).

მლდელი: მერმეცა გევედრებით, წყალობისა, სიცოცხლისა, მშუდობისა, სიმრთელისა, დღეგრძელობისა, ცხორებისა, განათლებისა, მოტევებისა, კეთილად წარმართებისა და მყუდროებისა მონათა (ანუ მკვევალთა) ღმრთისადათა და ყოველთა შულთა ჩუენისა ეკლესიისადათა, რაათა დაიცვას უფალმან ღმერთმან ჩუენმან სამეუფოა ქალაქი ესე ჩუენი და წმიდაა ესე ეკლესიაა და ყოველნი ქალაქნი და სოფელნი ივერიისა სიყმილისაგან, სრვისა, ძრვისა, დანთქმისაგან, ცეცხლისა და მახჯლისა, უცხოთესლთა ზედა მოსლჯსაგან, ბრძოლისა და სიკუდიდშემოსილისა წყლულებისა, რაათა მოწყალე გუექმნეს ჩუენ ღმერთი კეთილად დგომისათჯს სახიერებითა და კაცთმოყუარებითა თჯსითა, და გარეწარაქციოს რისხვაა, მარად დღე ჩუენ ზედა მომავალი, და გჯქსნეს ჩუენ სამართლად ჩუენ ზედა მოწევნულისა რისხვისაგან, და შეგჯწყალნეს ჩუენ.

გუნდი: უფალო, შეგჯწყალენ (12-გზის).

მლდელი: შეისმინე ჩუენი, ღმერთო, მაცხოვარო ჩუენო, სასოო ყოველთა კიდეთა ქუეყანისათაო, და რომელნი არიან ზღუათა შინა შორს, და მლხინებელ, და მოწყალე ექმენ შეცოდებათა ჩუენტა, და შეგჯწყალენ ჩუენ, რამეთუ მოწყალე და კაცთმოყუარე ღმერთი ხარ და შენდა დიდებასა აღგავლენთ, მამისა, და ძისა, და სულისა წმიდისა, აწ და მარადის, და უკუნითი უკუნისამდე.

გუნდი: ამინ.

საკვედრებელი ლოცვა

ჟ, დიდებით შუენიერო, მოციქულო და მოწამეო ქრისტქს ღმრთისაო, მახარებელო მშვიდობისაო და ქადაგო ყოვლადწმიდისა სამებისაო; წყაროო მოწყალებისაო და შესაკვედრებელო ყოვლისა სოფლისაო, უხილავო ზედამდგომელო სიწმიდისაო, და ურწმუნოთათჯს მომმადლებელო სარწმუნოებისაო; ჭეშმარიტო წინამძღუარო ცხორებისა ჩუენისაო და უძლეველო ზესთამბრძოლო ყოვლისა საქრისტეანოაო!

ჟ, ლუაწლით-შემოსილო წმიდაო მოციქულო თომა, ვერა იხილე რაა მკუდრეთით აღმდგარი მაცხოვარი ზეგარდამოათა დაშვებითა, ურწმუნო ქმნულსა გარწმუნა განშიშულებითა წმიდისა გუერდისაათა, და სხუათა მათ მოციქულთა თანა წარგავლინა რაა ქადაგებად სასუფეველისა, მოვლე ყოველი სოფელი, და ნათელი მისი განფინე რაა ჰინდოეთსა, სიბნელქს მკჯდრთა მისთა განაბრწყინვე, დიდებულო, და ძედ ნათლისა და დღისა გამოაჩინენ სულითა, აწ ჩუენცა გევედრებით მეოხებასა წინაშე ღმრთისა, განაქარვოს რისხვაა აღდგომილი ჩუენ ზედა, სიმრავლისაგან ცოდვათა ჩუენტასა, და აღაგზოს გულსა შინა ჩუენსა საღმრთოა ცეცხლი მოშურნეობისაა, რაათა ერთობითა ვჰბრძოდეთ ყოველთა წინააღმდგომთა მისთა, და ვიყოთ ერთ სამწყსოა და უფალი იყოს მწყემს ჩუენდა. მრავალშემძლებელითა ძალითა შენითა დაიფარე და განაძლიერე მსახურებასა შინა დიდი მეუფქს ჩუენი, უწმიდესი და უნეტარესი, სრულიად საქართველოს კათოლიკოს-პატრიარქი, მცხეთა-თბილისის მთავარეპისკოპოსი, და ბიჭვინთისა და ცხუმ-აფხაზეთის მიტროპოლიტი, მამაა ჩუენი ილია, ყოვლადსამღდელონი მიტროპოლიტნი, მთავარეპისკოპოსნი და ეპისკოპოსნი, პათიოსანნი მლდელნი, ქრისტეს მიერ დიაკონნი და ყოველნი სამონაზვნო წესნი, ზიარნი მართლმადიდებელისა ეკლესიისანი და ყოველნი მართლმორწმუნენი ქრისტეანენი.

ჟ, ყოველთა ქრისტეანეთა საქებელო, და შესაკვედრებელო ჩუენო, წმიდაო თომა მარჩივო, გამოგირჩია რაა კაცთა ცხოვნებად მოსრულმან ღმერთმან მოწაფედ თჯსად და მოციქულად, მოგცა კელმწიფებაა სნეულთა კურნებისაა, კეთროვანთა განწმედისაა, მკუდართა აღდგინებისაა და ეშმაკთა განდევნისაა, და აჰა, აწ წინაშე საყდარსა მისსა მდგომარემან შეიწირე ვედრებანი ჩუენნი და შეგვაწყნარე სახიერებასა მისსა, რაათა დაგვიფაროს სიყმილისაგან, სრვისა, ძრვისა, რღუნისა, ცეცხლისა, მახჯლისა, ჯდომათაგან მტერთააჰსა, ძმათამკულებლთა ბრძოლათაგან, მძლავრებისაგან ანტიქრისტქსა და საცთურთაგან მისთა, რაათა განვერნეთ ყოველთა საბრჯეთა სოფლისათა და წარუგალსა შუებასა მიმთხუეულნი დაუცხრომელად უგალობდეთ ყოვლადწმიდასა სამებასა, მამასა, ძესა და სულსა წმიდასა, აწ და მარადის, და უკუნითი უკუნისამდე, ამინ.

მლდელი: სიბრძნით!

ყოვლადწმიდაო ღმრთისმშობელო, გუაცხოვნენ ჩუენ.

გუნდი: უპატიოსნესა ქერობინთასა და აღმატებით უზესთაესსა სერაბინთასა, განუზრწნელად მშობელსა სიტყვსა ღმრთისასა, მხოლოსა ღმრთისმშობელსა გალობით გადიდებთ.

მღდელი: დიდებაჲ შენდა, ქრისტე ღმერთო, სასოებაო ჩუენო, დიდებაჲ შენდა.

გუნდი: დიდებაჲ მამასა და ძესა და წმიდასა სულსა, აწ და მარადის და უკუნითი უკუნისამდე, ამინ. უფალო, შეგვწყალებ (3-გზის). გუაკუროხენ.

მღდელი: ჩამოილოცავს...

გუნდი: ამინ.

ერისკაცმან: დიდებაჲ მამასა და ძესა და წმიდასა სულსა, აწ და მარადის და უკუნითი უკუნისამდე, ამინ.

უფალო შეგვწყალებ (3-გზის).

უფალო, იესუ ქრისტე, ძეო ღმრთისაო, ლოცვითა ყოვლადწმიდისა დედისა შენისაჲთა, წმიდისა მოციქულისა თომაჲსა და ყოველთა წმიდათაჲთა, შეგვწყალებ ჩუენ, ამინ.

ლოცუაი მთხვევნასა ზედა ხატისასა:

იესუ ქრისტესა შეუდეგ შენ წადიერებით, ყოვლად ქებულო თომა, და საღმრთოჲთა ბრძანებითა მივიღინე რაჲ შორიელთა მათ ქუეყანათა, ახარე სასუფეველი, ჯუარცუმაჲ ქადაგე და აღდგომაჲ მაცხოვრისაჲ, და აწ ვითარცა მოციქულსა და მოწამესა მისსა გაქუს კადნიერებაჲ, რაჲთა წყალობაჲ მოგუმადლოს მოშიშებითა შევრდომილთა ხატსა შენსა და დაგვიცვას მანქანებათაგან ეშმაკთაჲსა და ბოროტებისაგან კაცთაჲსა.

გაქუს რაჲ გამოუთქმელი სიმდიდრე წყალობისაჲ, ყოვლადწმიდაო ღმრთისმშობელო, შენდა მოვივლტით და გევედრებით, ვითარცა ურცხვენელსა მეონსა წინაშე ქრისტეს ღმრთისა მიმართ ჩუენისა, მოგვტევოს ყოველნი შეცოდებანი ჩუენნი და დაგვიცვას ყოვლისაგან საცთურისა და ვნებისა, რაჲთა შენითა შუამდგომელობითა ღირს-ვიქმნეთ ხილვად და დამკვდრებად სასუფეველისა.

დაუჯდომელი საგალობელი

წმიდისა მოციქულისა

თომა მარხბივისა

ლოცვითა წმიდათა მამათა ჩუენტათა, უფალო იესუ ქრისტე, ღმერთო ჩუენო, შეგვწყალებ ჩუენ, ამინ.

დიდებაჲ შენდა, ღმერთო ჩუენო, დიდებაჲ შენდა.

მეუფეო ზეცათაო, ნუგეშინისმცემელო, სულო ჭეშმარიტებისაო, რომელი ყოველგან ხარ და ყოველსავე აღავსებ მაღლითა შენითა, საუნჯეო კეთილთაო, მომნიჭებელო ცხოვრებისაო, მოვედ და დაემკვდრე ჩუენ შორის და წმიდა-მყვენ ჩუენ ყოვლისაგან ბიწისა და აცხოვნენ, სახიერო, სულნი ჩუენნი.

წმიდაო ღმერთო, წმიდაო ძლიერო, წმიდაო უკუდაო, შეგვწყალებ ჩუენ (3-გზის).

დიდებაჲ მამასა და ძესა და წმიდასა სულსა, აწ და მარადის და უკუნითი უკუნისამდე, ამინ.

ყოვლადწმიდაო სამებაო, შეგვწყალებ ჩუენ; უფალო, გვკსენ და გვლხინე ცოდვათა ჩუენტაგან; მეუფეო, შეგვზდვენ უსჯულოებანი ჩუენნი; წმიდაო მოიხილე და განჰკურნენ უძლურებანი ჩუენნი სახელისა შენისათჳს.

უფალო, შეგუწყალენ (3-გზის).

დიდებაჲ მამასა და ძესა და წმიდასა სულსა, აწ და მარადის და უკუნითი უკუნისამდე, ამინ.

მამაო ჩუენო, რომელი ხარ ცათა შინა, წმიდა იყავნ სახელი შენი, მოვედინ სუფევაჲ შენი, იყავნ ნებაჲ შენი, ვითარცა ცათა შინა, ეგრეცა ქუეყანასა ზედა, პური ჩუენი არსობისაჲ მომეც ჩუენ დღეს, და მომიტევენ ჩუენ თანანადებნი ჩუენნი, ვითარცა ჩუენ მიუტევებთ თანამდებთა მათ ჩუენთა და ნუ შემიყუანებ ჩუენ განსაცდელსა, არამედ მიკსნენ ჩუენ ბოროტისაგან.

უფალო, შეგუწყალენ (12-გზის).

დიდებაჲ მამასა და ძესა და წმიდასა სულსა, აწ და მარადის და უკუნითი უკუნისამდე, ამინ.

მოვედით, თაყუანის-ვსცეთ მეუფესა ჩუენსა ღმერთსა.

მოვედით, თაყუანის-ვსცეთ და შეუვრდეთ ქრისტესა მეუფესა ჩუენსა ღმერთსა.

მოვედით, თაყუანის-ვსცეთ და შეუვრდეთ თუთ ქრისტესა მეუფესა და ღმერთსა ჩუენსა.

მიწყალე მე, ღმერთო, დიდითა წყალობითა შენითა და მრავლითა მოწყალებითა შენითა აღკოცე უსჯულოებაჲ ჩემი. უფროჲს განმბანე მე უსჯულოებისა ჩემისაგან და ცოდვათა ჩემთაგან განმწმიდე მე, რამეთუ უსჯულოებაჲ ჩემი მე უწყი, და ცოდვაჲ ჩემი წინაშე ჩემსა არს მარადის. შენ მხოლოსა შეგცოდე და ბოროტი შენ წინაშე ვყავ, რაჲთა განმართლდე სიტყუათაგან შენთა და სძლო სჯასა შენსა, რამეთუ ესერა, უსჯულოებათა შინა მიუდგა და ცოდვათა შინა მშვა მე დედამან ჩემმან. რამეთუ ესერა, ჭეშმარიტებაჲ შეიყუარე, უჩინონი და დაფარულნი სიბრძნისა შენისანი გამომიცხადენ მე. მასხურო მე უსუპითა და განვწმიდნე მე, განმბანო მე და უფროჲს თოვლისა განვსპეტაკნე. მასმინო მე გალობაჲ და სინარული და იხარებდენ ძუაღნი დამდაბლებულნი. გარე მიაქციე პირი შენი ცოდვათა ჩემთაგან და ყოველნი უსჯულოებანი ჩემნი აღკოცენ. გული წმიდაჲ დაჰბადე ჩემ თანა, ღმერთო, და სული წრფელი განმიხსლე გუამსა ჩემსა. ნუ განმაგდებ მე პირისა შენისაგან და სულსა წმიდასა შენსა ნუ მიმიღებ ჩემგან. მომეც მე სინარული მაცხოვარებისა შენისაჲ და სულითა მთავრობისაჲთა დამამტკიცე მე. ვასწავლნე უსჯულოთა გზანი შენნი და უღმრთონი შენდა მოიქცენ. მიკსენ მე სისხლთაგან, ღმერთო, ღმერთო ცხორებისა ჩემისაო; იხარებდეს ენაჲ ჩემი სიმართლესა შენსა. უფალო, ბაგენი ჩემნი აღახუნენ, და პირი ჩემი უთხრობდეს ქებულებასა შენსა. რამეთუ უკეთუმცა გენება, მსხუერპლი შე-მცა-მეწირა, არამედ საკუერთხი არა გთნდეს. მსხუერპლი ღმრთისა არს სული შემუსრვილი, გული შემუსრვილი და დამდაბლებული ღმერთმან არა შეურაცხ-ჰყოს. კეთილი უყავ, უფალო, ნებითა შენითა სიონსა და აღეშენენ ზღუდენი იერუსალჴმისანი. მაშინ გთნდეს მსხუერპლი სიმართლისაჲ, შესაწირავი და ყოვლად-დასაწუელი, მაშინ შეიწირნენ საკუერთხეველსა შენსა ზედა ზუარაკნი.

### კონდაკი 1

სიყუარულითა გაქებთ შენ, მარჩბივად წოდებულსა ქრისტეს მოციქულსა, და გვედრებით სასოებითა შუამდგომლობისა შენისაჲთა, აღგვავსე სულითა სიბრძნისაჲთა და გულნი ჩუენნი დაამტკიცე სარწმუნობასა ზედა ჭეშმარიტსა, რაჲთა კეთილად ვმსახურებდეთ წმიდასა ეკლესიასა და ერსა, და არცალა დავსცხრეთ გალობად შენდა: გიხაროდენ, თომა მოციქულო, კეთილითა ურწმუნოებითა შენითა სარწმუნობასა შინა განმამტკიცებელო!

### იკოსი 1

ანგელოსთაგან დაფარულისა საიდუმლოჲსა მეცნიერ-იქმენ, მოციქულო, განიხილე რაჲ მარჯუენითა წყლულებაჲ ქრისტჴს ღმრთისაჲ, რომელმან კორცნი შეისხნა და განკაცნა ქსნისათუჴს კაცთაჲსა, და მის მიერ განათლებული უშიშად ქადაგებდი რაჲ სახელსა მისსა ქუეყანათა მათ უცხოთა, მოიმოწაფებდი და ნათელსცემდი მრავალთა ერთა სახელითა წმიდისა სამებისაჲთა, ხოლო იგინი სინარულითა გნატრიდენ და გაქებდენ შენ, ვითარცა განმანათლებელსა და მეოხსა მათსა:

გიხაროდენ, ქრისტეს მიერ საღმრთოსა სარბიელსა ზედა მოწოდებულო და მოწაფედ აღრჩეულო;

გიხაროდენ, მის მიერ უცნობელობიდან საღმრთო სიბრძნედ მიყვანებულო;

გიხაროდენ, მეკერპეთა ცრუ სჯულისა ძლევით მამხილებელო;

გიხაროდენ, ზეციერისა მამულისა გზისა მაჩვენებელო;

გიხაროდენ, ქრისტეს ვერცაღა მხილველთა რწმენად მისა მიმყვანებელო;

გიხაროდენ, საღმრთოაჲსა სრბისა კეთილად აღმასრულებელო;

გიხაროდენ, სისხლითა წამებისაჲთა ბრწყინვალედ განშუენებულო;

გიხაროდენ, უმეტეს მეფეთა და ჩინებულთა ამის სოფლისათა უფლისა მიერ საუკუნოდ განდიდებულო;

გიხაროდენ, ორთავ ეკლესიასა შინა - ქუეყნიერსა და ზეციერსა განბრწყინვებულო;

გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებელო!

## კონდაკი 2

სიყრმითგან ეძიებდი რაჲ ჭეშმარიტებასა, ოდეს მოვიდა იესუ გალილეად, თევზთა ნადირობაჲ ზღვასა შინა დაუტევე, და მკურვალედ შეუდეგ კორცითა გამოჩინებულსა ღმერთსა, და ერთგულებისათჳს შენისა შეგრაცხა რაჲ ათთორმეტთა მათ რჩეულთა მოციქულთა თანა, ჭურეტდი მის მიერ განკურნებულთა და აღდგენილთა, და თჳთცა მისითა მადლითა აღვსებული აქებდი ღმერთსა წადიერებითა: ალილუია.

## იკოსი 2

იქმენ რაჲ მოწაფჳ მაცხოვრისაჲ, თჳთმხილველ იყავ არა ხოლო თუ ქუეყნიერთა საქმეთა მისთა და სასწაულთა, არამედ ვნებათა მისთა და ნებსით სიკუდილისა, და იყავ დიდსა მას მწუნარებასა შინა, ხოლო წარმოტყუენა რაჲ ჯოჯოხეთი და აღდგა მკუდრეთით მესამესა დღესა, მეყსეულად ერუენა მენელსაცხებლეთა დედათა, და თქუენდა წარმოგზავნა, რაჲთა აღდგომაჲ მისი გახარონ მოწაფეთა მისთა, აწ ჩუენცა დანთქმულნი ცოდვათაგან შეგვავედრე ღმერთსა, რაჲთა აღვივსნეთ სიბრძნითა საღმრთოჲთა და ბაგენი ჩუენნი აღვძრათ გალობად შენდა:

გიხაროდენ, ნერგო სიმართლისაო, გალილეასა აღმოცენებულო;

გიხაროდენ, წინაჲსწარმეტყუელთაგან მოლოდებულისა მაცხოვრისა მხილველო და ბადითა მისითა მონადირებულო;

გიხაროდენ, ღმრთეებრივთა ბაგეთა მისთაგან მოძღურებისა მადლისა მომღებელო;

გიხაროდენ, ყოველთა სიტყუათა მისთა მტკიცედ დამმარხველო;

გიხაროდენ, ქრისტეს მიმოსლვისა თანამოგზაურო და მისთანა პურისა განმტეხელო;

გიხაროდენ, ერთისა ლელჳსა ქუეშე მის თანა შეფარებულო;

გიხაროდენ, ოთხისა დღისა მომკუდარისა ლაზარეს თანა სერისა მკუმეველო;

გიხაროდენ, „ოსანა მალალთა შინა ღმერთსა“ - კმამალლად მგალობელო;

გიხაროდენ, ქრისტჳსთანა სიკუდილისათჳს განმზადებულო;

გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებელო!

## კონდაკი 3

ოდეს გამოუჩნდა უფალი შიშითა ჰურიათაჲსა დაძალულთა მოწაფეთა, შევიდა რაჲ ბჭეთა მათ კშულთა, მისცა მშვიდობაჲ ფრიად მგლოვარეთა, და უჩუენა რაჲ კელნი და გუერდიცა თჳსი, მეყსეულად ჰბერა სული წმიდაჲ, და რქუა: „ვითარცა მომავლინა მე მამამან, მეცა წარგავლინებ თქუენ, რაჲთა ყოველთა კიდეთა ქუეყანისათა იქადაგოთ სახარებაჲ სასუფეველისაჲ, და უკუეთუ მიუტევენთ შეცოდებანი, მიეტევენეს ყოველთა“ და აღძრა ქებად და დიდებად მისა: ალილუია.

### იკოსი 3

ვერა იხილე რაჲ მკუდრეთით აღმდგარი მაცხოვარი ზეგარდამოთა განგებულებითა, ზრახვიდი გულსა შინა: „მე ხოლოჲ ვიპოვეა არაწმიდაჲ, არა ღირს ვიყავ რაჲ ხილვად მისა?“, და შეძრწუნებული ეტყოდი მოციქულთა: „არასადა მრწმენეს, ვიდრემდე არა შევანო კელი ჩემი წყლულებასა მისსა და დავსდვა თითი ჩემი ადგილსა სამსჭუალთასა“, გარნა ურწმუნოებაჲ შენი არა განკიცხულ იყო, რამეთუ საფუძველ იქმნა სარწმუნოებისა, რაჲთა გვრწმენეს ჩუენ ყოველთა აღდგომილი ქრისტე, და გაქებდეთ სიყუარულითა და მადლიერებითა:

გიხაროდენ, მწყურნებო ქსნისაო და ზიარო ქრისტეს მადლისაო;

გიხაროდენ, ყუავილო ღმრთისმოსავობისაო;

გიხაროდენ, ფესვო ღმრთისმეტყუელებისაო;

გიხაროდენ, შემყუარებელო სიმართლისა მზისაო;

გიხაროდენ, მსახურო განხორციელებულისა ღმრთისაო;

გიხაროდენ, თანამეინახელო მისისა უკუდავისა ტრაპეზისაო;

გიხაროდენ, ჭურო კეთილისა ზნეობისა და გონიერებისაო;

გიხაროდენ, ღირს ქმნილო ქრისტეს თანა-მზრახველობისაო;

გიხაროდენ, ღმრთივგანბრძნობილო ქადაგო ახლისა სჯულისაო;

გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებელო!

### კონდაკი 4

აღვისრულა რაჲ გულითადი წადილი ქრისტემან, კუალად გამოგიჩნდათ ერთად შეკრებულთა მოწაფეთა, და ვითარცა შეჰყრობილსა ურწმუნოებითა, წყლულებაჲ გუერდისაჲ და სახენი სამსჭუალთანი გაჩუენა და გრქუა მარჩბივისა: „მოილე კელი შენი და დამდეგ გუერდსა ჩემსა“, და შე-რაჲ-ეხე წყლულებასა მისსა, სინანულითა კმა ჰყავ: „უფალი ჩემი და ღმერთი ჩემი“, და მისცემდი მადლსა და დიდებასა: ალილუია.

### იკოსი 4

ურწმუნოებამან შვა და დაამტკიცა რაჲ სარწმუნოებაჲ, დაღადავ სინარულითა დიდითა: „ჭეშმარიტად იგი არს, რომელი ჯუარსა ზედა ივნო, დაეფლა და აღსდგა ცხორებისათჳს ჩუენისა და ღირს არს თაყუანისცემისა და გალობისა“, ამისთჳსცა გვიყვარს, თომა, შენი ეგე ურწმუნოებაჲ საიდუმლოჲსა ამისა, რომლისა მიერ გვრწმენეს ჩუენცა იესუ ღმრთად და გევედრებით: შეგვეწიე წინაშე მისა, მოგუცეს ძლევაჲ ეშმაკთაჲ და მანქანებათა მათთაჲ შემსხმელთა შენთა და მაქებელთა:

გიხაროდენ, თომა, წმიდაო მოციქულო, რამეთუ შენ გეტყოდა იესუ: „მე ვარ გზაჲ და მე ვარ ჭეშმარიტებაჲ და ცხორებაჲ“;

გიხაროდენ, რამეთუ ფრიად იხარებდი, ჭურეტდი რაჲ კართა ხშულთა ქრისტეს საკურველად განვლასა;



გიხაროდენ, რამეთუ მცირედ ურწმუნო ქმნულსა გარწმუნა მან განშიშულებითა წმიდისა გუერდისაათა, რაათა გვრწმენეს ჩუენ მდიდრად;

გიხაროდენ, რამეთუ იჭვენუელთა გამოძიებითა შენითა აღმოფხვრიდი ძირსა ურწმუნობისასა;

გიხაროდენ, რამეთუ ქრისტჳს თანა იყოფვოდი ნავსა შინა ზღუასა მას ტიბერიისასა;

გიხაროდენ, რამეთუ თაყუანის-ეც წყალთა ზედა ფრხივ-მაკალსა უფალსა;

გიხაროდენ, რამეთუ არა დანთქმულ იქმენ წყალთა მიერ ურწმუნობისათა;

გიხაროდენ, რამეთუ არა წარწყმედულ იქმენ ქარიშხალთა მიერ იჭვენუელობისა;

გიხაროდენ, რამეთუ უფსკრულსა დანთქუმად განმზადებულსა გიპყრა კელი ქრისტემან და განგიმჟღავნა საიდუმლონი ზეცისანი;

გიხაროდენ, თომა მოციქულო, კეთილითა ურწმუნობითა შენითა სარწმუნობასა შინა განმამტკიცებელო!

### კონდაკი 5

ეჰა გამოუთქმელი სიმდაბლჳ ღმრთეებისაჲ, განამტკიცნა რაჲ გული შენი სარწმუნობითა აღდგომისა თვისისაათა, თაყუანს-სცემდი ჯუარცმულსა მას, ვითარცა ძესა ღმრთისასა, ზოლო იგი გეტყოდა: „შენ მიხილე და გრწმენა, არამედ ნეტარ იყვნენ, რომელთა არა უხილავ მე და ჰრწმენეს“, და აჰა, აწ ჩუენცა ყოვლისაგან იჭვისა თავისუფალნი შენებრ ვლადადებთ: „უფალი ჩემი და ღმერთი ჩემი“, და დაუცხრომელად უგალობთ და ვადიდებთ: აღილუია.

### იკოსი 5

აღდგომისა თვისისა ახალკურიაკჳ გაუწყათ რაჲ ქრისტემან მოწაფეთა თვსთა, მრავალნი სხუანიცა სასწაულნი ქმნნა, და გიბრძანათ რაჲ: „წარვედით და მოიმოწაფენით ყოველნი წარმართნი“, მეერგასესა დღესა სული წმიდაჲ მოგივლინათ სახედ ცეცხლისა, რამეთუ ყოველთა იწყეთ სიტყუად უცხოთა ენათა, რაათა ყოველთა მიუთხრობდეთ დიდებასა ღმრთისასა, აწ ჩუენცა შეგვაწყნარე ძალსა მისსა, რაათა დანერგოს ჩუენ შორის სული სიწმიდისა და კაცმოყუარებისაჲ, და ღირს გვყოს ჯეროვნად შეწირვად გალობისა:

გიხაროდენ, მკუდრეთით აღდგომილისა იესუს ცხადად მხილველო;

გიხაროდენ, ღმრთეებრივისა კმისა მისისა მსმენელო და მისგან ზეციერისა მშუდობისა მიმღებელო;

გიხაროდენ, მშვიდობითა ამითა ქუეყნიერებისა კიდეთა დამამშუდებელო;

გიხაროდენ, დიდებითა ზეცად აღმაღლებისა მისისა მჭურებელო;

გიხაროდენ, ქრისტეს მიერ აღთქმულისა სულისა წმიდისა მადლითა აღვსებულო და განათლებულო;

გიხაროდენ, მის მიერ დიდად პატივდებულო და სამკალისა მუშაკად მოწოდებულო;

გიხაროდენ, ვენახსა მისსა კეთილად დამაშურალო და ასწილისა ნაყოფისა გამოძლებელო;

გიხაროდენ, წყარო, მადლისა მდინარეთა წარმომადინებელო;

გიხაროდენ, სულისა წმიდისა ნიჭთა სიმრავლისაგან წყურიელთა სულთა დამარწყულებელო;

გიხაროდენ, თომა მოციქულო, კეთილითა ურწმუნობითა შენითა სარწმუნობასა შინა განმამტკიცებელო!

### კონდაკი 6

სარწმუნოებამან ქრისტეს აღდგომისამან განგამტკიცნათ რამ მოციქულნი განათლებად ყოველთა წარმართთა, წილად გხვდა მოქცევაჲ ჰინდოთაჲ, და იჭვენულ იყავ რამ სიძნელისათჳს ველურთა ერთა მოქცევისა, არა გენება წარსლვაჲ, გარნა ხილვასა შინა გერგენა უფალი, და მარადის შენთანა ყოფაჲ აღვითქუა, აწ ჩუენცა ვესავთ ოხითა შენითა შეწვენასა მისსა, რამთა კეთილად განვვლოთ ცხორებაჲ ჩუენი, და არცაღა დავსცხრეთ გალობად ღმრთისა: ალილუია.

## იკოსი 6

ჟამსა მას მეფესა ჰინდოთასა ეწადა რამ აღშენებაჲ დიდებულისა სასახლისაჲ, პალესტინეს წარმოგზავნა ავან დიდვაჭარი პოვნად ხუროთმოძღვრისა, და ძიებასა მას შეგემთხვია რამ, მოციქულო, აღუთქვი აღსრულებაჲ სამეფოჲსა ბრძანებისაჲ, და მრავალთა განსაცდელთა მიერ მიიწიეთ რამ ქუეყანასა მას, წარგადგინა წინაშე მეფისა, ხოლო მან მოგანიჭა საფასჳ დიდი, და ნაცულად პალატთა შენებისა, ოქროჲ იგი განუყავ უპოვართა, და ყოველთა უქადაგებდი ქრისტესა, აწ ჩუენცა შეგვავედრე კაცთმოყუარებასა მისსა, რამთა მოგვცეს სიბრძნჳ ღირსად შენდამი გალობისაჲ:

გიხაროდენ, ახოვანო მოგზაურო, ფერკთა შენთა სახარებისა საქადაგებელად წარმმართველო;

გიხაროდენ, მწყემსო კეთილო, ცხოვართა შეცთომილთა მეძიებელო;

გიხაროდენ, მოძღუარო მრავალნაყოფიერო, მგელთა მტაცებელთა მამხილებელო;

გიხაროდენ, ჰინდოეთსა სლვისასა წარმართთათჳს სიმართლისა მაუწყებელო;

გიხაროდენ, კერპთაყვანისმცემელთა ერთა ქრისტეს ნათლისა მიმართ მომწოდებელო;

გიხაროდენ, ცნობასა სულიერსა საღმრთოსა ურიცხუთა სულთა მიმყუანებელო;

გიხაროდენ, დაცემულთა აღმადგინებელო და განწირულთა მსწრაფლ-შემწეო;

გიხაროდენ, ჭირვეულთა და ძურ-ხილულთა კელის-აღმპყრობელო;

გიხაროდენ, ქურივ-ობოლთა გამომზრდელო და მწუხარეთა ნუგეშინის-მცემელო;

გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებელო!

## კონდაკი 7

წარმოგზავნა რამ მეფემან მსახურნი თჳსნი და გკითხვიდა შენებისათჳს სასახლისა, აღუთქვი მისი მსწრაფლ დასრულებაჲ, სანატრელო, და უხუად გიბოძა რამ საფასჳ შესამკობელად მისა, კუალად განუყოფდი ქერივ-ობოლთა, და მოაქცევდი მრავალთა, გარნა აუწყეს მეფესა შენ მიერ ქადაგებაჲ ახლისა ღმრთისაჲ, და წარმოგზავნა რამ მხედარნი შეპყრობად შენდა, უშიშად წარყვებოდი, ახოვანო, და სლვასა მას შინა ადიდებდი ღმერთსა: ალილუია.

## იკოსი 7

გულისწყრომითა გკითხვიდა რამ მეფჳ გუნდაფორი აღშენებისათჳს სასახლისა, აუწყე საფასითა მით სამეფუოთა პალატთა აღგებაჲ ცათა შინა, და ახარებდი: „გარდახვალ რამ საწუთოჲთგან, საუკუნოდ დამკვდრდები და იშუებ მას შინა“, გარნა ვერა გულისკმაყო სიტყუანი შენნი და შთაგაგლო რამ დილეგსა, ქრისტესა ღმერთსა სასოებდი და ნუგეშინისცემდი ვაჭარსა მას, შენთანა პყრობილსა, აწ ჩუენცა გვიოხე წინაშე ღმრთისა, რამთა განგვარინოს ყოვლისაგან ბოროტისა, და აღგვძრას შეწირვად შენდა გალობისა და ქებისა:

გიხაროდენ, ქრისტეს სახელის სადიდებელად განმამრავლებელო მრავალსახეთა სასწაულთა და სათნოებათაო;

გიხაროდენ, მისთჳს ახოვნად თავსმდებელო ურიცხუთა ღუაწლთა და განსაცდელთაო;

გიხაროდენ, სასოებითა მისითა განმანათლებლო მრავალთაო;  
გიხაროდენ, ჭეშმარიტსა სარწმუნოებასა ზედა დამამყარებლო ურწმუნოთაო;  
გიხაროდენ, მორწმუნეთაგან განმდევნებლო სულიერთა ვნებათაო;  
გიხაროდენ, განმამრთლებლო უღმრთოებითა მოწყლულთაო;  
გიხაროდენ, ლოცვითა აღმკოცველო კერპთა და ბომონთაო;  
გიხაროდენ, უფლისა მიმართ მიმყვანებლო კერპთმსახურთაო;  
გიხაროდენ, თანამოღუაწყო და შემწყო შეცთომილთაო;  
გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებლო!

### კონდაკი 8

სათნო იყო რამ ქრისტემან კსნამ შენი, წმიდაო, მეყსეულად მოკუდა ძმამ მეფისამ, და ანგელოზმან აღიტაცა რამ ცათა შინა, აჩვენა შენ მიერ აღშენებული სასახლწ ძმისა თუსისამ, და უკუნ-აქციეს რამ სული მისი კორცსა, აღდგა, ვითარცა ძილისაგან და უშუენიერესთა პალატთა ქონამ საუკუნოსა მას ცხორებასა ახარა რამ მეფესა, შევრდომითა გვედრებოდა მიტევებასა ბრალისასა, და აქებდა ღმერთსა, წმიდათა შორის სანატრელსა: აღილუია.

### იკოსი 8

ჴ, საკურველი შეწვენამ ღმრთისამ ნებისყოფელსა მისსა, რამეთუ ორნივე ეგე ძმანი სიხარულითა შეიტკბობდენ რამ ქრისტეს მოძღურებასა, ნათელ-სცემდი მათ ერთა თანა, და ასწავებდი თაყუანისცემასა ყოვლადწმიდისა სამებისასა, აწ ჩუენთუსცა ევედრე მას, განგვიმრავლოს კეთილმსახურნი მთავარნი და განმგებელნი, რამთა სიწრფოებითა ზრუნვიდენ ერისა ჩუენისათუს და ჰნატრიდენ საქმეთა შენთა:

გიხაროდენ, იესუს ძედ ღმრთისად და ძედ კაცისად ყოველთათუს მაუწყებლო;  
გიხაროდენ, უცნობელთა მისთა ღმრთისმეცნიერებად მიმყვანებლო;  
გიხაროდენ, ბრძენთა და კეთილად მხედველთა აღმამაღლებლო;  
გიხაროდენ, სარწმუნოებისაგან განდრეკილთა შემრისხველო;  
გიხაროდენ, კეთილმორწმუნეთა მაკურთხეველო და მწყალობელო;  
გიხაროდენ, ეკალთა უსჯულოებისათა აღმომფხურელო და ჭეშმარიტებისა იფქლისა დამთესველო;  
გიხაროდენ, სულთა წარმწყმედელთა საქმეთა აღმკოცველო;  
გიხაროდენ, მეფისათუს ზეციერისა პალატისა აღმგებლო;  
გიხაროდენ, ძალითა ღმრთისამთა მრავალთა სასწაულთა და კურნებათა აღმასრულებლო;  
გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებლო!

### კონდაკი 9

ოდეს ანგელოზთა აღიტაცნეს მოციქულნი და ღრუბლითა მიიწინეს იერუსალწმად მიძინებასა ყოვლადწმიდისა დედისასა, ჴ, საკურველი განგებულბამ ძისა მისისამ, რამეთუ დაყოვნებულ იქმენ ჰინდოეთსა, და მიიწიე რამ გეთსამანიასა შემდგომ დაკრძალვისა, იყავ დიდსა მას მწუხარებასა შინა

და ფრიად გეწადა ხილვამ ყოვლადწმიდისა დედისაჲ, აწ ჩუენცა შეგვეწიე წინაშე მისა, რამთა სარწმუნოებასა შინა განგვაძტიცოს წილხვედრნი თუსნი და აღგვეძრას ქებად და გალობად ღმრთისა: აღილუია.

## იკოსი 9

გესმა რაჲ გალობაჲ იგი ზეცისა ძალთაჲ ძრვასა მას ქუეყანისასა, გულისკმა-ყავ, ვითარმედ ჟამი იგი მსგავს იყო ქრისტეს საფლავით აღდგომისა, ურწმუნო ქმნულსა გარწმუნა რაჲ განშიშულებითა წმიდისა გუერდისაჲთა, და ითხოვე განღებაჲ ღმრთისმშობლის სამარისაჲ, გარნა ვერცაღა პოვეს წმიდაჲ გუამი ქრისტეს ყოვლადწმიდისა დედისაჲ მოციქულთა, და ცრემლთა წილ აღივსენ სიხარულითა, რამეთუ მიზეზითა შენითა განცხადნა ზეცად აღყვანებაჲ მისი ძისა მიერ მისისა, და განატრიდენ სურვილითა:

გიხაროდენ, მჭურეტელო საღმრთოჲსა განგებულებისა საიდუმლოჲსაო;

გიხაროდენ, მრავალთა განმსწავლელო სჯულსა შინა ჭეშმარიტსაო;

გიხაროდენ, ბნელსა შინა მსხდომარეთა აღმომწოდებელო ნათლისა მიმართ ცხორებისაო;

გიხაროდენ, მრავალსა ქუეყანასა განმავრცობელო ქრისტეს ეკლესიისაო;

გიხაროდენ, გეთსამანიასა ღრუბლითა მიწვეწულთა დატირებად ღმრთისმშობლისაო;

გიხაროდენ, საფლავისაგან მისისა გარდამგორვებელო ქვისაო;

გიხაროდენ, კაცთათუს განმმხელელო დიდისა სახარულისაო;

გიხაროდენ, მათთუს მახარებელო ღმრთისმშობლის აღდგომისაო;

გიხაროდენ, მსწრაფლ განმამრთელებელო კორცთა და სულთა უძლურებისაო;

გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებელო!

## კონდაკი 10

საღმრთოჲსა სიბრძნესა შინა განსწავლული ქრისტეს მოციქულად მოევლინე რაჲ პალესტინესა და შუამდინარეთსა, ურწმუნოებისა ბნელსა შინა დანთქმულთა განუცხადებდი სახარებისა მქსნელსა ნათელსა, და ძალითა ღმრთისაჲთა აღასრულებდი რაჲ ნიშ-სასწაულთა და კურნებათა, აღუშენე ეკლესიანი მადლითა საღმრთოჲთა, და მღდელთა ერთა თანა ასწავებდი სამებისა ერთღმრთეებისა დიდებასა: აღილუია.

## იკოსი 10

საღმრთოჲთა მოშურნოებითა აღვსილი უკუ-იქეც რაჲ ჰინდოეთსა, მრავალნი მოაქციენ ქალაქსა მელიაპორსა, და განკურდა რაჲ მოგვი ვინმე შურითა საეშმაკოჲთა, ცილი დაგწამა მოკვლასა შინა ძისა თუსისასა, ხოლო შენ ქრისტეს სახელითა უბრძანე განცხადებაჲ მკულელისაჲ ცხედარსა, და ვითარცა ცოცხალმან კმა-ყო და მკულელად სახელ-სდვა რაჲ მამასა თუსსა, მხილველთა ამისა ქრისტე აღიარეს ღმრთად ჭეშმარიტად, რომელმანცა ესევითარი მადლი მოგანიჭა მსახურსა თუსსა, და სასოებითა მისითა აღვსილნი გაქებდენ სარწმუნოებითა:

გიხაროდენ, ვარსკულავო ნათელმფენო, სიმართლისა მზისა - ქრისტეს მიმართ მრავალთა წარმმართველო;

გიხაროდენ, ბრწყინვალეებითა სულისა შენისაჲთა უღმრთოებისა წყუდიადისა განმფანტველო;

გიხაროდენ, საღმრთოჲთა ძალითა ურწმუნოთა ცილისწამებისა განმაქარვებელო;

გიხაროდენ, საცთურითა დაბნელებულთა პართთა და მიდიელთა განმანათლებელო;

გიხაროდენ, გირკანელთა ქრისტეს სჯულსა შინა განმსწავლელო;

გიხაროდენ, ჭემშარიტებისა პურიტა ბაქტრიელთა და ბრაჰმანთა გამომზრდელო;

გიხაროდენ, მგელთა მტაცებელთა კეთილად გარდამცვლელო;

გიხაროდენ, ქრისტეს სახელისა სადიდებელად მოგეთა გრძნებისა დამარღვეველო;

გიხაროდენ, ბოროტმზრახვალთა პირთა დამკშველო და სივერაგისა მათისა დამკსნელო;

გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებელო!

## კონდაკი 11

ვითარცა მოციქულმან ქრისტესმან წმიდად და დიდებული სახელი მისი უკანადასკნელ ჰქადაგე რაჲ ქალაქსა კალამინსა, მოაქციე არა ხოლო თუ საყვარელი ძმ და ცოლი მეფისა მუზდისაჲ, არამედ დიდებულნი და მსახურნი მისნი და წარგადგინეს რაჲ წინაშე მისა, ამაოდ გაიძულებდა უარყოფასა ღმრთისა შენისასა, რამეთუ პირველ გტანჯა განკურებულთა რვალითა, და მერე შთაგადლო რაჲ მოტყინარესა მას ღუმელსა, ზეგარდამოძთა მადლითა შეცურეული უვნებელად ჰკიებდი და აღიდებდი ღმერთსა: ალილუია.

## იკოსი 11

ქრისტემან არცხვინა რაჲ სიმკეცესა მას მძლავრისასა, არა გულისკმა-ყო მან ნიში ეგე საღმრთოჲ, და გაიძულებდა თაყუანისცემასა მზის კერპისასა, გარნა ვითარცა ცვილი მსწრაფლ დადნა რაჲ ლოცვითა შენითა, მორწმუნენი იხარებდენ, ხოლო წარმართნი ევედრებოდენ რაჲ მეფესა მოკუდინებასა შენსა, „ვითარცა „ღმრთეებისა“ მათისა აღმზოცველსა, შეძრწუნდა უსჯულოჲ იგი, და მოკლვაჲ შენი უბრძანა მხედართა, ამისთვისცა სამართლად პატივს გცემთ და ვლალადებთ წადიერად:

გიხაროდენ, ღმრთისა სიტყვსა, ვითარცა თესლისა კეთილისა დამთესველო;

გიხაროდენ, ცრუ-მორწმუნეობისა საცთურისა დამშრეტელო;

გიხაროდენ, ძალითა ჯუარისაჲთა ეშმაკის სიბოროტისა დამკსნელო;

გიხაროდენ, ქრისტეს მსახურებისათვის ზღუათა შინა და ქუეყანასა ზედა მრავალთა განსაცდელთა დამთმენელო;

გიხაროდენ, ლამპარო აღგზებულო, გონიერთა განმანათლებელო და უგუნურთა დამწველო;

გიხაროდენ, სიმდაბლითა და ღმობიერებითა შენითა ველურთა კაცთა უღმობელოობისა მომდრეკელო;

გიხაროდენ, ურჩთა და ბრალეულთა სინანულად მომყვანებელო;

გიხაროდენ, კერპოვანებისა სიბნელითა გონებადაბნელებულთა ღმრთისა მიმართ მომაქცეველო;

გიხაროდენ, ჩუენ მიერ სამართლად პატივისცემულო და მარადის კსენებულო;

გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებელო!

## კონდაკი 12

განვიყვანეს რაჲ გარე ქალაქისა მხედართა, მორწმუნენი ტირილითა შეუდგენ კუალსა შენსა, ნეტარო, და ითხოვე რაჲ ჟამი აღსრულებისათვის ლოცვისა, კელი დაასხნი ზუცად სიფორსა და მეფისწულსა აზანსა დიაკონად, და ანდერძად დაუდე რაჲ განმრავლებაჲ მორწმუნეთაჲ, განგვიძირეს მტარვალთა

ხუთითა ლახუართა, და სასოებითა შეჰვედრე რაჲ წმიდაჲ სული თჳსი უფალსა, მოციქულთა და მარტულთა თანა დაგამკურა სასუფეველსა შინა თჳსსა, ხოლო მრავალმოღუაწმ გუამი შენი დაკრძალეს მოწაფეთა შენთა პატივითა, და დაუწყვედელად აღმოაცენებდი კურნებსა და მრავალთა აღძრვიდი დიდებად ღმრთისა: ალილუია.

## იკოსი 12

სიხარულითა აღივსების აწ დიდებული სიონი, რამეთუ დავანებულ არს კანკელსა მისსა წმიდაჲ და პატიოსანი თავი შენი - სასოდ და შესავედრებელად ერისა ჩუენისა, და მღღელთმთავარნი და მღღელნი მორწმუნეთა თანა წლითი-წლად აღასრულებენ რაჲ დღესასწაულსა შენსა, საფარველითა თჳსითა იცავ ყოველთა შენდა შევედრებულთა, და მიჰმადლებ უხვსა საბოძვარსა წყაროჲსაგან ულევისა მადლისა, აწ ჩუენცა მოჴსწრაფვით მიმთხვევად სიწმიდისა მის შენისა, და გიგალობთ ძალისაებრ ჩუენისა:

გიხაროდენ, ქრისტეს სიყუარულისათჳს სისხლისა დამთხვეელო და სასუფეველსა მისსა დამკჳდრებულო;

გიხაროდენ, შემდგომად სიკუდილისაცა მრავალთა სულთა ქრისტეს მიმართ მიმყვანებულო;

გიხაროდენ, მტარვალისა მის მეფისა მუხდისა ჭეშმარიტსა სარწმუნოებასა ზედა მომაქცეველო, რამეთუ მისა მისისაგან მეყსა შინა განვიდა სული უკეთური ნაწილთა შენთა შეხებითა:

გიხაროდენ, სუეტო სარწმუნოებისაო, რამეთუ დიდად პატივსა სცემდა სამარხოსა შენსა მეფე იგი და აღაგო რაჲ ტაძარი მას ზედა, მხარე იგი ჰინდოთაჲ, ვიდრე აქამომდე წოდებულ არს ქუეყანად „წმიდისა თომაჲსა“;

გიხაროდენ, მნათობო ქრისტეს ეკლესიისაო, რამეთუ წმინდანი ნაწილნი შენნი პირველ წარიხუნეს რაჲ შუამდინარესა, მერმე დაიუნჯეს ვითარცა იტალიამან და საბერძნეთმან, ეგრეთცა ათონმან, ივერიამან და უნგრეთმან;

გიხაროდენ, რამეთუ იხარებს დედა-ქალაქი ჩუენი დავანებისათჳს წმიდისა თავისა შენისა სიონისა ეკლესიასა შინა;

გიხაროდენ, რამეთუ იქადის გელათი მწიაღებელი წმიდათა ნაწილთა შენთა;

გიხაროდენ, რამეთუ უკუეთუ ვინმე ლოცვითა მიეახლება სიწმიდეთა მათ შენთა, იქსნი მათ ყოვლისაგან ბოროტისა;

გიხაროდენ, რამეთუ ერისა ჩუენისა მფარველთა მოციქულთა თანა განგადიდებთ;

გიხაროდენ, თომა მოციქულო, კეთილითა ურწმუნოებითა შენითა სარწმუნოებასა შინა განმამტკიცებულო!

## კონდაკი 13

ჴ, კეთილად ღმრთისმეტყველო თომა მოციქულო, რომელმან მოვლე ყოველი სოფელი და საცთური კერპთაჲ, ვითარცა ნასხლევი დასწვენ ქრისტეს მოძღურებითა, აწ ჩუენცა აღგძრავთ მეოხებად მისა მიმართ, ურიცხუთა მტერთა და განმკრწნელთა საცთურთაგან გარე-შეცულნი დაგვიცვას ყოვლისაგან ბოროტისა, რაჲთა სიწმიდითა და ღირსებითა განვკლოთ ჟამი ცხორებისა ჩუენისაჲ, ვიდრემდის არა მივიწივნეთ ნეტართა მათ სავანეთა ზეცისათა და შენ თანა ვადიდებდეთ ყოვლადწმიდასა სამებასა: ალილუია.

ეს კონდაკი 3-გზის, შემდეგ იკოსი 1 და კონდაკი 1

სავედრებელი ლოცვა

ჭ, დიდებით შუენიერო, მოციქულო და მოწამეო ქრისტეს ღმრთისაო, მანარებელო მშვიდობისაო და ქადაგო ყოვლად-წმიდისა სამებისაო; წყაროო მოწყალებისაო და შესავედრებელო ყოვლისა სოფლისაო, უხილავო ზედამდგომელო სიწმიდისაო, და ურწმუნოთათჳს მომმადლებელო სარწმუნოებისაო; ჭეშმარიტო წინამძღუარო ცხორებისა ჩუენისაო და უძლეველო ზესთამბრძოლო ყოვლისა საქრისტეანოასაო!

ჭ, ღუაწლით-შემოსილო წმიდაო მოციქულო თომა, ვერა იხილე რაჲ მკუდრეთით აღმდგარი მაცხოვარი ზეგარდამოათა დაშვებითა, ურწმუნო ქმულსა გარწმუნა განშიშულებითა წმიდისა გუერდისაათა, და სხუათა მათ მოციქულთა თანა წარგავლინა რაჲ ქადაგებად სასუფეველისა, მოვლე ყოველი სოფელი, და ნათელი მისი განფინე რაჲ ჰინდოეთსა, სიბნელეს მკუდრთა მისთა განაბრწყინვე, დიდებულო, და ძედ ნათლისა და დღისა გამოაჩინენ სულითა, აწ ჩუენცა გვედრებით მეოხებასა წინაშე ღმრთისა, განაქარვოს რისხვამ აღდგომილი ჩუენ ზედა, სიმრავლისაგან ცოდვათა ჩუენთასა, და აღაგზოს გულსა შინა ჩუენსა საღმრთოჲ ცეცხლი მოშურნეობისაჲ, რაჲთა ერთობითა ვჰბრძოდეთ ყოველთა წინააღმდგომთა მისთა, და ვიყოთ ერთ სამწყსოჲ და უფალი იყოს მწყემს ჩუენდა. მრავალ-შემძლებელითა ძალითა შენითა დაიფარე და განაძლიერე მსახურებასა შინა დიდი მეუფეს ჩუენი, უწმიდესი და უნეტარესი, სრულიად საქართველოს კათოლიკოს-პატრიარქი, მცხეთა-თბილისის მთავარეპისკოპოსი, და ბიჭვინთისა და ცხუმ-აფხაზეთის მიტროპოლიტი, მამამ ჩუენი ილია, ყოვლადსამღელღონი მიტროპოლიტნი, მთავარეპისკოპოსნი და ეპისკოპოსნი, პატროსანნი მღდელნი, ქრისტეს მიერ დიაკონნი და ყოველნი სამონაზვნო წესნი, ზიარნი მართლმადიდებელისა ეკლესიისანი და ყოველნი მართლმორწმუნენი ქრისტეანენი.

ჭ, ყოველთა ქრისტეანეთა საქებელო, და შესავედრებელო ჩუენო, წმიდაო თომა მარჩივო, გამოვირჩია რაჲ კაცთა ცხოვნებად მოსრულმან ღმერთმან მოწაფედ თჳსად და მოციქულად, მოგცა კელმწიფებაჲ სნეულთა კურნებისაჲ, კეთროვანთა განწმედისაჲ, მკუდართა აღდგინებისაჲ და ეშმაკთა განდევნისაჲ, და აჰა, აწ წინაშე საყდარსა მისსა მდგომარემან შეიწირე ვედრებანი ჩუენნი და შეგვაწყნარე საზიერებასა მისსა, რაჲთა დაგვიფაროს სიყმილისაგან, სრვისა, ძრვისა, რღუნისა, ცეცხლისა, მანჯლისა, კდომათაგან მტერთაჲსა, ძმათამკულელთა ბრძოლათაგან, მძლავრებისაგან ანტიქრისტესა და საცთურთაგან მისთა, რაჲთა განვერნეთ ყოველთა საბრკეთა სოფლისათა და წარუვაღსა შუებასა მიმთხუეულნი დაუცხრომელად უგალობდეთ ყოვლადწმიდასა სამებასა, მამასა, ძესა და სულსა წმიდასა, აწ და მარადის, და უკუნითი უკუნისამდე, ამინ.

ღირს არს ჭეშმარიტად, რაჲთა გადიდებდეთ, შენ, ღმრთისმშობელო, რომელი მარადის სანატრელ იქმენ, ყოვლადუბიწოდ და დედად ღმრთისა ჩუენისა, უპატიოსნესსა ქერობინთასა და აღმატებით უზესთაესსა სერაბინთასა, განუხრწნელად მშობელსა სიტყვსა ღმრთისაჲსა, მხოლოსა ღმრთისმშობელსა გალობით გადიდებთ.

დიდებაჲ მამასა და ძესა და წმიდასა სულსა, აწ და მარადის და უკუნითი უკუნისამდე, ამინ.

უფალო, შეგვწყალებ (3-გზის).

უფალო იესუ ქრისტე, ძეო ღმრთისაო, ლოცვითა ყოვლად წმიდისა დედისა შენისაათა, წმიდისა თომა მოციქულისა და ყოველთა წმიდათა შენტაათა, შეგვწყალებ ჩუენ, ამინ.

შეადგინა თინათინ მჭედლიშვილმა  
რედაქტორი ნონა ნამგალაძე